

Wël Jethu cï Joon gõt Wët nhom

Wël cï Joon gõt aa Jethu nyuwoth ke ye Wët theer Nhialic tō thïn ë lanayon ku emën, ku abï tō thïn ë lanayon ku emën, ku abï tō thïn atheer, “Ku Wët aci bën a raan ku ciëŋ kek yo.” Cïmën ye athöör nhom guöp ye lueel, Joon ë gät wëlkä rin bï kəc kuen ye ŋic lön nadë ke Jethu yen Aluëëk, Wën Nhialic wäär cï lëk kəc. Ku kəc bï wëtde gam aabi pïr. (20:31)

Jethu aye nyuwoth aban tuen yic, lön ë yen Wët Nhialic. Ku wël kək bö ciëen ë kënë cök, aa kək juëc jän göi cï Jethu looi. Ku kakkä aa Jethu nyuwoth aya lön ë yen Wën Nhialic, ku ë yen Aluän wäär cï lueel. Kakkä cök, kək jän göi cï röt tieŋ aaci teet yiic. Aban athör kënë ë yo lëk tē cï kəc kək wët Jethu gam thïn ku buøthkë. Ku dhäl kəc kək wëlke ku cïk wëtde gam.

Jək cökdiit 13 yet 17 ala yic tē cï Jethu kek kacken ye buwoth rëer thïn ë tøk wëer aköl wäär däm ye. Ku ëcï jam tënë kacken ye buwoth näakde nhom tuen tē bï kek röt guier thïn, ku deet kepuøth. Cök ciëen aa yo lëk dömdöm Jethu, ku luønde ku piëet cï ye piäat tim cï rïiu kəu, ku jön rotde. Ku jəl a nyooth cï yen rot nyuwoth tënë kacken ye buwoth jön rotde cök ciëen. Anyiköl tin cï kəar ye yök cökdiit 8 yic, jək cök koor 1 yet 11 aci nyään wei kək cï gät theer yiic. Ku akëc kəc tuen kek ke war gëtget wël Jethu yiic gõt. Ku aye kəc kək gõt aya tädët.

Joon ë miöc pïr akölrïëc ebën bï gäm kəc tē gem wët Raan cï ləc ku dəc, dëet kəc puøth. Ku ë miöc bï

rot jock emen ke bi gam kac bi Jethu gam, lon ye yen
dhel ku yic ku pir.

Kak to thin

Kak ci got tuej 1:1-18

Joon raan kac muoc nhim ku kac ci Jethu kan
buoth 1:19-51

Piöc e Jethu 2:1-12:50

Nin ciën kadhorou thuonde nom tuej 13:1-
19:42

Jön rot ku nyooth rot Bëny 20:1-31

Kak ci got ciën nyooth rot det Galilia 21:1-25

Wet Pir

¹ Wätheer kec nhial ku piny cak, Wet e to thin, ee
reer kek Nhialic, ku Wet e ye Nhialic.

² Wet e reer kek Nhialic waar cek kan.

³ Kajuec reer nhial ku piny ebën aake cak e ye. Ku
acın kak to thin kec ke cak ke yeen liu thin.

⁴ Kuat kak to thin ebën aa pir yok tene ye. Ku
pierde aci ruel gam raan ebën.*

⁵ Pierde yen e ruel dep apeı muöth yic, ku akec
leu bi kuöm nyin piny.

⁶ Nhialic eci atuönyde tooc, raan cal Joon.

⁷ Aci ben bi kac ben lek bik ruel njic. Aci ben bi lek
ke bi raan ebën wet pin ku gam.

⁸ Yeen ecie yen ruel, aci ben bi kac ben lek ruel.

⁹ Ku Wet yen e ye ruel ayic, ruel ci ben pinyhom
tene raan ebën.

¹⁰ Wet e to pinyhom, ku Nhialic e cak piny e ye,
ku akec kac pinyhom njic.

* **1:4** Wet yen aci ben aa pir **1:6** Mt 3:1; Mk 1:4; Lk 3:1-2

11 Yeen aci bën tēnē kāk ke cī cak, ku akēc kōcken cī cak lor.

12 Ku aci kōc abēk bën lor ku gamkē wētde, goke gām riel bīk aa mīth Nhialic.

13 Keek aacie mīth Nhialic cīt tē ye kōc dhiēeth thīn, cimēn ye mīth la wun dhiēeth ke. Ee Nhialic guōp yen ē Wunden.

14 Wēt aci bën a raan ku ciēŋ ke γo. Ku diεkde acuk tīŋ, diik Wēn tōŋ Nhialic. Ku ē yen bīi yic, ku lier puōu Nhialic tēnē γo.

15 Ku Joon aci tuōl ku lēk kōc ē rienke ēlä, “Kēnē yen ē raan wäär ye γen jam ē rienke, raan wäär ya lueel ēlä, ‘Yen abī lōk bën γacōk, ku adīt tēnē γa. Yeen ē rēer thīn wäär ke γa kēc cak dhiēeth.’ ”

16 Rin kāpuōth ē yen Wēn Nhialic, yen aci γo dōc ēbēn, dōc tōk ē dōc dēt cōk.

17 Wāthēer lōŋ ēcī Nhialic gām kōc ē Mothith, ku emēn Nhialic aci yic ku lier piānde gām kōc ē Jethu raan cī lōc ku dōc.

18 Acīn raan cī Nhialic kaŋ tīŋ tēγon. Ee Wēn tōŋ thōŋ kek Nhialic, rēer Wun lōm yen aci γo cōl anjic Nhialic.

*Athōn Joon raan kōc muōc nhīm
(Mt 21:12-13; Mk 1:1-8; Lk 3:1-18)*

19 Kōcdīt Itharel Jeruthalem aake cī kōc kāk Nhialic ku kōc kuat Lebī tuōc tēnē Joon, bīk la thiēec ēlä, “Ye yīn ŋa?”

20 Ku Joon akēc bën jai bī wētden dhuk nhom. Acī bën bēer ē cōk ku lueel ēlä, “Acie γen Raan cī lōc ku dōc.”

21 Gokë thiëec, “Aye yin ɲa? Ee yin Elija?” Go bɛɛr, “Acie ya.” Gokë bɛn thiëec, “Ye yin raandit kāk Nhialic tiŋ bī bɛn?”† Go dhušk ke, “Yei! Acie ya.”

22 Gokë lueel, “Lɛk ɣo, ee yin ɲa? ʏok aa dhil wɛt dhušk kɔc ke toc ɣo. Ye rot yök ë yin ɲa?”

23 Go Joon bɛɛr, “ʏɛn ë jam apɛi roor tɛ cii ceŋ, ‘Guiɛrké dhël Bɛny bī la cök cimɛn wäär cī Ithaya raan kāk Nhialic tiŋ ye lueel.’ ”

24 Röörkä aake tooc kɔc akut Parathī,

25 ku jɔlké Joon bɛn thiëec ëlä, “Yeŋö ë yin kɔc muɔɔc nhiiim tɛ cii yin ye Raan cī lɔc ku dɔc, ku yin acie Elija ku cii ye raandit kāk Nhialic tiŋ?”

26 Go Joon dhušk ke, “ʏɛn ë kɔc muɔɔc nhiiim piü ë path, ku raan arɛɛr kamkun ë tɛn ku acäk ɲic,

27 raan yen lök bɛn ɣacök ciëen, ku acä lëu ba warke dök.”

28 Kën ë loi rot pan cɔl Bethanī, wär Jordan kōu tɛwäär ye Joon kɔc muɔɔc nhiiim thīn.

Amälthiin Nhialic

29 Naɣon aköl dɛt ke Joon tiŋ Jethu ke bö tɛnë ye, go lueel, “Tiɛŋkë Amälthiin Nhialic yen bä adumuɔöm kɔc pinynhom nyaai, kan abö.

30 Yen ë raan ye ɣɛn jam ë rienke wäär ë ɣɛn ye lueel ëlä, ‘Yen abī lök bɛn ɣacök, ku adit tɛnë ɣa. Yeen ë rɛɛr thīn wäär ke ɣa kɛc cak dhiëeth.’

31 Aacä ɲic bī ya yen ɲa, ku ɣɛn acī bɛn ku ya kɔc muɔɔc nhiiim piü rin bī ɣɛn ye cɔl anɲic kɔc Itharel.”

32 Ku ëcī Joon lueel aya ëlä, “ʏɛn acī Wëi Nhialic tiŋ ke bö kecit kuur ë dit, ku nyuuc yenhom.

† 1:21 Raan kāk Nhialic tiŋ bī tuöl, bī bɛn Raan cī lɔc ku dɔc bɛn lueel. Tiŋ L.rou 18:15, 18; Mt 4:5 1:23 Ith 40:3

³³ Ku ë ηot këc ηic, ku ëcī Nhialic raan toc γa ba këc aa muəc nhīim pīu, lëk γa ëlä, ‘Raan bī yīn Wëi Nhialic tīη ke bö ku nyuuc yenhom yen ë raan bī këc muəc nhīim Wëi Nhialic.’

³⁴ Ee yic, aca tīη ku alëu ba lueel, wenhīim lən ë yen Wën Nhialic.”

Kəc cī Jethu kaη buəθh

³⁵ γən aköl dët, Joon ë kääc kek këcken ye buəθh karou tëwäär aköl.

³⁶ Nawën tīη Jethu ke tək tëthiök ke ke, go Joon döt apëi ku lueel, “Tiëηkë, yen akan yen Amäl Nhialic.”

³⁷ Ku jəl piη këc ye buəθh awën karou këya, gokë Jethu buəθh.

³⁸ Nawën wel Jethu yenhom, ke tīη ke ke buəθh ye, go ke thiëc, “Yëηö wiëckë?” Gokë lueel, “Rabi, rëër tënë?” (Ku wëtde yic, “Raan Piöc.”)

³⁹ Go lëk ke, “Bäk, bäk bën tīη.” Gokë la ku tīηkë të rëer yen thīn. Ku ë ye tääh aköl, ku jəlkë rëer kek ye abī piny cuəl.

⁴⁰ Raan tök kam këc wën karou cī wët Joon piη ku buəθh Jethu, ee ye Andria wämënh Thaimon Pīter.

⁴¹ Naγən nhiäk rial, ke Andria räm ke mënhë, go lëk ye, “γok aaci Methaya yök.” (Ku wëtde yic Raan cī ləc ku dəc.)

⁴² Ku γëth Thaimon tënë Jethu. Go Jethu döt apëi ku lueel, “Yīn ë Thaimon wën Joon, yīn abī cəl Kepa.” (Ku yen Pīter wëtde yic ee kuur.)

Jethu aci Pilipo ku Nathaniel cəəl

⁴³ Nawën aköl dët ke Jethu la Galilia, ke räm kek Pilipo, go lëk ye, “Buəθh γa.”

⁴⁴ Ku Pilipo ë raan Bethaida, ku ë gen yï Andria ku Piter aya.

⁴⁵ Go Pilipo Nathaniel yök ku lëk ye, “Yök aaci raan wäär ci Mothith gät ë rienke athör löön yic, raan yen ci kəc kək Nhialic tñj gät ë rienke aya, acuk yök. Yen ë Jethu wën Jothep raan Nadharet.”

⁴⁶ Go Nathaniel lueel, “Ye këpiath nõ lëu bi tuöl Nadharet?” Go Pilipo bëër, “Bäär ba tñj.”

⁴⁷ Nawën tñj Jethu Nathaniel ke bö, ke jam rin Nathaniel ku lueel, “Raan kënë ë raan Itharel ayic guöp, kecïn guöp ruëny.”

⁴⁸ Go Nathaniel lueel, “Ca ñic kädë?” Go Jethu bëër, “Yïn guə ñic wën rëer yïn ñaap cök, tëwën këc Pilipo la bi yï la cəəl.”

⁴⁹ Go Nathaniel bëër ku lueel, “Raan piöoc, yïn ë Wën Nhialic, yïn ë Bëny Itharel.”

⁵⁰ Go Jethu bëër, “Ca jäl gam rin ci yen ye lëk yï lön ci yen yï tñj wën rëer yïn ñaap cök? Yïn abi kädit kək wär ë kəkä tñj!”

⁵¹ Ku ben mat thïn, “Wët yic alëk we, wek aabi nhial tñj ke liep rot, ku atuuc Nhialic aa bək tñj ke bö piny tënë Manh Raan ku lek nhial.”

2

Yan thiëek pan Kana

¹ Nin kadiäk cök ciëen, ke ruääi loi gen Kana pan Galilia. Ku man Jethu ë tō thïn,

² ku Jethu ëci cəəl yai yic aya kek kəcken ye buəth.

³ Nawën la mōu thök, ke lëk man ye, “Mōu aci liu tënë ke.”

4 Go Jethu lueel, “Tinjë, yin aciï kë luoi dhil lëk ya. Akäldië anot këc yëët.”

5 Go man lëk kəc luoi, “Luoi kë kək bi lëk we ebën.”

6 Ku tönydit kadätem aake cäp kəc löm. Tönykä aake ye ke pïu tääu thïn bi kəc kecök aa lək, cīt tē ye löŋ ciεεŋ kəc Itharel ye nyuəəth thïn. Ku tőöny tök ë jət tē cīt tən adušk thiär-rou, tädë adušk thiärdiäk.

7 Go Jethu lëk kəc luoi, “Thiänkë tönykä pïu.” Gokë töny thiöŋ abik thook alic.

8 Ku jəl Jethu lëk ke, “Gëmkë ye tönykä yiic, ku gäm kək ke raan yen wun ruäai.” Gokë looi këya,

9 ku jəl raandit kəc athiëk awën pïu thiëp, pïu ci waar bi ya möu. Ku akuc tē bïi möu thïn, aa kəc luoi wën thiöŋ töny kek aa ŋic ye. Go raandit kəc athiëk wun nya cəəl,

10 ku lëk ye, “Raan ebën ë muön path kaŋ gam tuen, ku na ci kəc jäl kueth ke muön lir ajəl lək gam. Ku yin ci muön path waan ciëen agut emën.”

11 Kënë yen ë këdit jän göi ci Jethu kaŋ looi gen Kana pan Galilia. Ku yen aci diëtde nyuəəth, ku aaci kacken ye buəəth jäl gam.

12 Nawën ë këne cök, ke Jethu la Kapernaum kek man ku wëët wun ku kacken ye buəəth, ku rëerkë thïn ë tēen nin lik.

Jethu aci la luanŋ Nhialic

(Mt 21:12-13; Mk 11:15-17; Lk 19:45-46)

13 Yən ci Yan Ayum cin yic luou jäl thišk, ke Jethu la Jeruthalem.

14 Ku jəl ler kal luanŋ Nhialic yic, ke yök kəc ke yəəc wei thïn ë yäk ku amël ku jəl aa kuör. Ku kəc wëëu waar yiic aake ci nyuc thïn aya.

15 Go waat nai ë wiën, ku cop kɔc wei kal luan Nhialic yic kek ɣækken ku thäkken ku weer wëüu wei, ku wel agenken yiic.

16 Ku lëk kɔc kuɔr ɣaac wei, “Nyaaikë kakkä ë tɛn, ku duökkë ɣön Wä cɔl aye ɣön ɣɔc.”

17 Go kɔcken ye buoθh wël cï gõt athör thɛr wël Nhialic yic tak. Wël ye lueel ëlä, “Yin Nhialic, nhiër ɣöndu adɛp ɣapuðu cimën mac.”

18 Go kɔcdit Itharel bën ku thiëckë, “Ye këdit jän ɣöi yindë ba looi ba nyuöth ɣo, lɔn le yin yic ba këcit këne looi?”

19 Go Jethu bëer ku lëk ke, “Rackë luan Nhialic këne, ku aba bɛn looi nin kadiäk.”

20 Gokë lueel, “Acï ruöön thiärɣuan ku dätəm nök bi jäl thök, ku luel ka ba looi nin kadiäk yiic?”

21 Ku luan Nhialic jiem Jethu ë ɣuäpde.

22 Ku na wäär la jɔt ran yic, ke kɔcken ye buoθh tak këwäär cï lueel. Ku gamkë wël thɛr Nhialic cï gõt, ku wël cï Jethu lëk kɔc.

23 Tëwäär rëer yen Jeruthalem yai yic, ke kɔc juëc gam wëtde wën tijn kek kækken jän ɣöi cï looi.

24 Ku aake njic Jethu ëbën ku yen akëc rot nyuöth ke.

25 Ku acin kën nadë ke wïc raan dët bi ye nyuöth kɔc, rin anjic käk tö raan puðu.

3

Jethu ku Nikodemo

1 Raan akut Parathï cɔl Nikodemo, ku ë ye raandit kɔc Itharel ë tö thïn,

² naʒon akəu wëer tök ke la tənë Jethu ku lueel, “Raan piöoc, aɲicku yin ë raan piöoc ci Nhialic tooc. Rin acin raan loi kək jəŋ gōi cimən yin, tē liu Nhialic kek ye.”

³ Go Jethu bëer, “Yin alək yic, acin raan bi bääny Nhialic tin, tē cii ye ben dhiëeth dhiën dët.”

⁴ Go Nikodemo lueel, “Bi raan ben dhiëeth kədë? Lëu bi dhuk man yac bi jal ben dhiëeth?”

⁵ Go Jethu bëer, “Wët yic alək yi, raan kəc ben dhiëeth ë piu ku Wëi Nhialic, acii bääny Nhialic bi yök.

⁶ Raan aye dhiëeth kəc ë path, ku Wëi Nhialic ë pir yam ye Nhialic gam kəc.

⁷ Duk ye gai tē lək yen yi, lon dhil we ben dhiëeth.

⁸ Wëi Nhialic acit mën dhie ye raan yom pin ke wuu, ku cii tē bii yen thin ku tē le yen thin ɲic. Yen ë tən kəc bi ben dhiëeth Wëi Nhialic.”

⁹ Go Nikodemo thiëc, “Bi kënë rot lëu kədë?”

¹⁰ Go Jethu lək ye, “Yin ë raan piöoc kəc pan Itharel ku kuc kënë!

¹¹ Wët yic alək yi, yok aa jam kək ɲicku ku luelku kək cuk tin. Ku ɲot we jei bək wëtta cii gam.

¹² Na cak wëtdië gam tē jiem yen kək pinynhom, ke we bi wëtdië gam kədë tē jiem yen tənë we kək Nhialic?

¹³ Acin raan cii kaŋ la nhial bi kək Nhialic bëi, ee raan bə nhial Manh Raan bə piny nhial.”

¹⁴ Cimən wäär ci Mothith luŋ wëeth cit këpiiny jat nhial roor bi yen kəc ci këpiiny cam aa dəc, ke Manh Raan adhil yäth nhial,

¹⁵ rin bi raan gam wëtde ëbën pir aköriëec ëbën yök.

16 Nhialic anhiar kəc pinynhom apɛi. Yen agem yen Wənden juəl, bī raan ebən wətde gam cīi mār, ku pūrkə akōlriēec ebən.

17 Ku Nhialic akēc Wēnde tuōc piny bī kəc bən luək wei, ee rin bī thāi pinynhom pīr ē rienke.

18 Raan gam wətde acīi bī luək wei, ku raan cī jai bī wət cīi gam acī luək wei, rin kēc yen wət Wēn tōōŋ ē Nhialic gam.

19 Ku kən bī ke luək wei akīn, ruel acī bən pinynhom ku kəc aa nhiar muōōth tən ruel rin aa luui kārɛc.

20 Raan ebən kārɛc looi ē ruel maan ku cīi la ɣer yic, rin cīi yen kārɛc ye looi wīc bī ke ŋic.

21 Ku raan luui kāpath ē bən ɣer yic bī luəide nyuōōth, rin cī ke luōi Nhialic.

Joon acī bən jam rin Jethu

22 Nawən ke Jethu kek kəcken ye buōōth la pan Judia, ku rēer thīn ke ke, ku muōc kəc nhīim pīu.

23 Ku Joon ē ye kəc muōc nhīim aya tē cəl Aenon thiāak kek Thalim la yic pīu juēc. Ku kəc aake ye la bī ke la muōc nhīim.

24 (Ku Joon ē ŋot kēc guō mac.)

25 Nawən ke kəc Joon buōōth kək jəl teer kek raan Itharel rin lək ye kəc kegup lək,

26 gokē la tēnē Joon ku luelkē, “Raan piōc, lēu ba mony wāār rēer kek yī wār Jordan aləŋtui tak, raan ye yīn jam ē rienke? Yen amuōc kəc nhīim emən, ku kəc juēc aala tēnē ye!”

27 Go Joon bēer, “Acīn tē bī raan kədāŋ yök tē kēc Nhialic ye gām ye.

28 Week wepëc acäk piñ ke lëk we ëlä, ‘ÿen acie Raan cï lóc ku dác, ku ÿen acï tuöc tuen̄ ë path yenhom.’

29 Raan thiëk yen ë raan bï gäm nya, ku mäthde ë köc ku ë puöu miët tē piñ yen rölde. Yen ë miët piändië aya ëmën.

30 Yen abï dhiël düt apëi ku ÿen abï kuur.”

31 Raan bö nhial adüt tēnē kóc ëbën, ku raan piiny ë kën piny. Raan bö nhial atö kóc nhïim tuen̄ ëbën.

32 Ee kóc lëk käk cï tiñ ku käk cï piñ, ku acin raan wëtde gam.

33 Ku raan cï gam, acï gam lön ye Nhialic yic lueel.

34 Raan cï Nhialic tooc yen ë jam wël Nhialic, rin aye Nhialic gäm riel Wëike ëbën.

35 Wun ë Wënde nhiaar ku tēu këriëc ëbën yecin.

36 Raan gam wët Wën ë Nhialic abï pïr akölriëc ëbën, ku raan cïi wët Wën Nhialic bï gam acïi pïr akölriëc ëbën bï yök, rin acin kë bï riäak puöu ë Nhialic nyaai tēnē ye.

4

Jethu ku tiñ pan Thamaría

1 Nawën ke ñic Jethu lön cï kóc akut Parathï ye piñ, lön nadë ke kóc aa bën tēnē ye bï ke bën muöc nhïim, ku lön cï yen la kóc juëc ye buöth wär kóc Joon buöth.

2 (Ku acie yen ye kóc muöc nhïim, aa kacken ye buöth.)

³ Nawën piŋ wët ye lueel, go jäl pan Judia ku dhuk Galilia.

⁴ Ku ë bī dhiel yet pan Thamaria rin yen ë dhël tēek yen thīn.

⁵ Go yet pan Thamaria cəl Thikar thiääk ke piny wäär cī Jakob gäm wēnde Jothep.

⁶ Ku yinh cī Jakob cəl awec ë tō thīn. Nawën cī Jethu dak ë cāth, gō nyuc yith lööm. Ku ë ye aköl ciel yic.

⁷ Go tiŋ pan Thamaria bēn yiith bī bēn gem pīu, go Jethu lēk ye, “Muɔc ɣen pīu ba dek.”

⁸ (Ku kɔcken ye buɔth aake cī la geeu bīk la ɣɔɔc miēth.)

⁹ Go tiŋ pan Thamaria lēk ye, “Kēdē wēn? Yīn ë raan Itharel ku thiēc ɣa, ɣen raan Thamaria ba yī muɔɔc ë pīu?” (Kɔc Itharel aake cie dek kek kɔc Thamaria.)

¹⁰ Go Jethu bēēr, “Na yī ŋic miēc Nhialic ku raan thiēc yī pīu ŋuɔt aca thiēc, ku ŋuɔt aci muɔɔc pīu pīr.”

¹¹ Go tik lueel, “Bēny, yīn acīn kē gem yīn pīu, ku yith amec yic, ba pīu pīr yök tēnen?”

¹² Ye yīn dīt tēnē wādīt Jakob raan cī ɣo gäm yinh kēnē, ku dēk thīn yen ye nhom kek miēthke ku yäkke?”

¹³ Go Jethu bēēr, “Kuat raan dek piukä abī rou bēn nök,

¹⁴ ku raan bī dek pīu ba yiěk ye acīi rou bī bēn nök, ku pīu bī yiěk ye aabī ya dhiama yeyic ye pīu pīr kuēr thīn, ku yīk ye pīr alanden.”

15 Go tik lëk ye, “Bëny, yiëk ɣen piukä bi rou ɣa cii ben nök, ba cii ben bën tën ba bën gem piu.”

16 Go Jethu lëk ye, “Ləər cəl muonydu bäk bën tën.”

17 Go tik lueel, “ɣen acin moc.” Go Jethu bëër, “Këdu ë yic, lön cïn yin moc.

18 Yin aci kaŋ rëër kek röör kadhiëc, ku mony rëër kek yi ëmën acie muonydu. Yin aci yic lueel.”

19 Go tik lueel, “Bëny aca ɳic, yin ë raan kək Nhialic tiŋ.

20 Wärkuan thær pan Thamaria aake ye Nhialic door ë ɣən kënë nhom, ku ayakë lueel wek kəc Itharel lön dhil ɣok Nhialic la door Jeruthalem.”

21 Go Jethu lueel, “Gam wëtdië, yin tiŋë tē bi wek Wä door aci thiök, ku acie ɣən kënë nhom ku acie Jeruthalem.

22 Wek kəc Thamaria wek kuc raan yakë door, ku ɣok kəc Itharel ɣok aa ɳic raan yeku door rin pir abö tënë Itharel.

23 Ku aköl ajöl bën, ku aci ɣuo bën ëmën ɣuöp, tē bi riel Wëi Nhialic kəc cəl aa dor Wä cიმენდე, kek aa kəc wic Wä bik ye door.

24 Nhialic ë Wëi, ku rin riel Wëike yen alëu ye bi door cიმენდე.”

25 Go tik bën lëk ye, “Aɳiɛc lön bi Raan ci ləc ku dəc bën. Na le bën ka bi ɣo nyuöth këriëc ëbën.”

26 Go Jethu bëër, “Yen ë ɣen, raan jam kek yi.”

27 Ku kaamthiin wën jiɛm kek, ke kacken ye buəth bö ku ɣëikë apɛi rin jiɛm yen kek tik. Ku acin raan tök kamken ci tik thiëc, “Yenö wic, ku yenö jiɛm yen kek ye?”

28 Go tik tönyden piu nyääŋ piny, ku kət ke dhuk geeu ku lëk kəc.

29 “Bäk tiēṅkē mony cā lēk kēriēēc ēbēn ca looi. Nadē ke ye Raan cī lōc ku dōc?”

30 Gokē bēn bei geeu bīk la tēnē Jethu.

31 Ku kaamthiin wēn, ke lēk kōcken ye buōth ye, “Raan piōōc, jōl mīth.”

32 Go bēēr, “Υεν ala miēth, cīn kē ṅiēckē thīn.”

33 Go kōcken ye buōth rōt jal aa thiēēc kamken, “Tēdē le raan cī miēth bēēi tēnē ye?”

34 Go Jethu lēk ke, “Miēthdiē ee lōn ba wēt raan toc υεν looi, ku thāāp luoi cī gām ya.

35 Cāk kāāṅ ye lueel dhie ēlä, ‘Pēi kaṅuan aṅoot ku rap abī tem.’ Ku alēk we, jatke wenyīn bāk dum tīṅ, yemēn rap aaci luok ku apath bī ke tem!

36 Raan rap tem aye riōp ku ē kōth pīr tem alanden, kēya raan cumcum ku raan tēmtēm aabī puōth miēt kedhie.

37 Kāāṅ aci ya yic. ‘Raan tōk ē com ku tēm raan dēt.’

38 Wek tuōōc bāk rap la tem dom yic ku ē dom kēc wek luui thīn. Kōc kōk aaci luui thīn ku wek aa rōt kony luoiden.”

39 Go kōc juēc Thamaria ē gen wēn yic wēt Jethu gam, rin cī tik wēt lueel ēlä, “Kēriēēc ēbēn ca looi aci lēk ya.”

40 Nawēn bō kōc Thamaria tēnē ye ke lāṅkē bī rēer ke ke. Go Jethu nīn karou nōk thīn tēēn.

41 Go kōc kōk juēc wētde jāl gam rin wēl ye lēk ke,

42 ku lēkkē tik, “Ēmēn, yok aaci wēt jāl gam, ku akēcku gam rin wēlkun ca lueel, ku ē rin cī yok wētde piṅ ku ṅicku lōn ē yen Aluāṅ kōc pinynhom ēbēn alanden.”

Jethu aci manh bēny kony

⁴³ Nawën cī nīn karou nōk thīn tēēn, ke Jethu jōl jāl ku ler lōŋ Galilia.

⁴⁴ Rin yen Jethu guōp ēcī lueel lōn, “Raan kāk Nhialic tīŋ acie theek wuōnden.”

⁴⁵ Nawën yeet Galilia ke lor apēi, rin wäär cī kek kāk cī Jethu looi yai yic tīŋ, wäär cī kek la Yan Ayum cīn yic luōu yic Jeruthalem.

⁴⁶ Go Jethu bēn dhuk gen Kana tō Galilia, tēwäär cī yen piū waar thīn bī ya muōn abiēc. Ku raandīt kam kōc mac baai cī manhde tuaany Kapernaum ē tō thīn.

⁴⁷ Nawën piŋ lōn cī Jethu jāl Judia ku ben dhuk Galilia, ke la tēnē ye ku lēŋ bī la Kapernaum bī manhden cī thiōk ke thou kony bī pial.

⁴⁸ Go Jethu lēk ye, “Acīn raan bī ye gam kamkun tē kēc wek kīt ku kādīt jāŋ gōi tīŋ.”

⁴⁹ Go raandīt awēn bēēr ku lueel, “Bēny, bäär lokku ba manhdiē dōōt.”

⁵⁰ Go Jethu lēk ye, “Lōōr, manhdu abī pīr.” Go mony wēn wēt Jethu gam ku jiēl.

⁵¹ Wēn ciēth yen dhēl yic, ke rām kek kōcken luōi ku luelkē, “Manhdu acī yōr.”

⁵² Go ke thiēēc akōl alōŋ jōl manhde ŋuēēn. Gokē lueel, “Wārakōl tāāŋ akōl yen ē jiēl juāi yeguōp.”

⁵³ Go wun ŋic lōn ē yen akōl alōŋ wäär cī Jethu ye lēk ye ēlā, “Manhdu abī pīr.” Ku jōl wēt Jethu gam kek kacke ēbēn.

⁵⁴ Kēnē, yen aye kādīt jāŋ gōi cī Jethu looi rou, wäär le yen dhuk Judia ku ler Galilia.

5

Raan tuany ruöön 38 acı kony

¹ Nawën ke yan kəc Itharel ë tö thïn, go Jethu la Jeruthalem yai yic.

² Ku tětthiääk kek tēt cəl Kal Aməl Thok, pul ë tö thïn, pul cəl Bethaida thon kəc Itharel.

³ Ku kəc juęc tuany aake ye təc thïn, kəc cı cəər ku kəc cı ɲəl ku kəc cı duany. Ku keek aake ye pıu tiit bık la tiaktiak,

⁴ rin atuny Nhialic ë ye bən pul yic, ku cəl pıu ala tiaktiak, ku raan cı kaɲ la wı̄r tēt cı pıu röt tiak, ke kony kuat tuəny tö yeguöp.

⁵ Ku raan tuany ruöön thiärđiäk ku bēt ë tö thïn.

⁶ Nawën tiɲ Jethu puək yic ke cı təc, ku aɲic lən cı ye tuaany run juęc, go thiëc, “Wıc ba pial?”

⁷ Go raan tuany bëər, “Bëny, acın raandiën tö tən bı̄ ɣa ɣäth wı̄r tēt tiak pıu röt thïn, rin na them ba la thïn, ke raan dēt ë kaɲ wër thïn.”

⁸ Go Jethu lək ye, “Jət rot ku löm bişɲdu ku cathë.”

⁹ Go raan wën guə pial ku kuəny bişɲde ku ciəth. Ku aköl looi kən rot ë ye aköl cı̄ kəc Itharel ye luui,

¹⁰ go kəc Itharel lək mony cı̄ kony, “Yaköl, aköl cı̄ kəc ye luui, ku akəc puəl tənë yı̄ ba bişɲdu ket.”

¹¹ Go bëər, “Acı raan cä kony ba pial lək ɣa ëlä, ‘Löm bişɲdu ku cathë.’ ”

¹² Gokë thiëc, “Yeɲa yen raan cı̄ lək, ‘Löm bişɲdu ku cathë?’ ”

¹³ Ku raan cı̄ kony ë kuc raan kony ye, rin kəc juęc aake tö ë tēwën ku Jethu ëcı̄ la liəplāɲ wei.

14 Nawën ke yök Jethu luan Nhialic, go lëk ye, “Tij yin aci pial emën, päl adumuööm, tädët ke kädët rac apeï abi röt ben luoi yi.”

15 Go mony wën jäl ku le lëk bäny Itharel lön ë Jethu yen aci ye kony bi pial.

16 Gokë jök bik Jethu aa jöör rin ci yen raan kony aköl cii kóc ye luui.

17 Go Jethu bëër tënë ke ëlä, “Wä ë luui akölaköl, ku yen adhil luui aya.”

18 Ku jam kënë aci bäny Itharel rac puöth apeï, ku wickë bik nöck, ku acie rin ci yen löñ aköl cii kóc ye luui thoñ rot, ee rin ci yen ye lueel lön ye Nhialic Wun, ku këya aci rot looi bi thoñ kek Nhialic.

19 Go Jethu jal bëër, “Wët yic alëk we, acin kë ye Wät looi piände ë rot, kë ye looi ë tök, ee kë ci tij kë ye Wun looi. Ku kë ye Wun looi aye Wënde looi aya.

20 Rin Wun ë Wënde nhiaar, ku nyuth këriëc ye looi. Ku kädit tënë këwën aabi nyuöth ye, ku wek aabi jal gai ëbën.

21 Cimën ye Wun kóc ci thou jot ku yik ke pir, ke Wënde aya ë pir yiëk kóc wic ye.

22 Wun guöp acin raan ye luök wei. Ku aci Wënde yiëk riel bi looi tënë ke ëbën.

23 Rin bi kóc ëbën Wënde theek cimën ye kek Wun theek. Kuat raan cie Wënde ye theek, acie Wun ye theek raan toc ye.

24 “Wët yic alëk we, raan pinj wëtdië, ku gam wët raan toc ya pir akölrüëc ëbën atö tënë ye. Aci bi luök wei, yeen aci jäl thou yic ku yök pir.

25 Wek aa lëk yic, aköl bi bën, ku aci guö bën tē bi kóc ci thou röl Wën Nhialic pinj, ku kóc bi ye pinj aabi pir.

26 Cīmēn ye pīr bēn bei tēnē Wun, kēya, yeen aci Wēnde looi bī ya tē ye pīr bēn bei thīn aya.

27 Ku yeen aci Wēnde yiēk riēl bī luk looi tēnē kəc, rin ye yen Manh Raan.

28 Duōkkē gēi ē wēt kēnē, akōl bī kəc cī thou rōlde piŋ rēŋ yiic abō,

29 ku keek aabī bēn bei rāŋken yiic, kəc cī ŋiēc luui apath aabī rōt jət ku aabī pīr, ku kəc cī luui kārēc aabī rōt jət ku aabī luōk wei.

30 “Acīn kē lēu ba looi piāndiē ē rot, γen ē wēt teem kecīt kē cī Nhialic lēk γa, kēya wēt ca teem ala cōk rin acie wēt piāndiē yen wiēc ba looi, ee wēt wīc raan toc γa ē rot.

31 “Na jaam ē riēnkiē ke kē luēel acie gam ciēt ye yic.

32 Ku raan dēt jam ē riēnkiē atō thīn, ku aŋiēc lōn kē ye lueel riēnkiē ē yic.

33 Atuc aa cāk tuōc tēnē Joon ku yeen aci wēt yic lueel.

34 Acie lōn bī γen la raan jam ē riēnkiē, aya lueel yen kēnē rin bī wek pīr.

35 Joon ē ye kēcīt mermer dēp ku mer piny, ku week ē yakē wīc kaam thin-nyōt bāk puōth miēt thīn ruēlde.

36 Ku raan jam ē riēnkiē atō thīn, ku wētde aril tēnē wēt cī Joon lueel ē riēnkiē luoi ya ke looi, luoi cī Wā yiēk γa ba ke looi, keek aa jam ē riēnkiē ku nyoothkē lōn cī Wā γa tooc.

37 Ku Wā aya, raan toc γa, yen ajam ē riēnkiē aya. Wek aa kēc rōlde kaŋ piŋ ku akēckē kaŋ tiŋ,

38 ku wēt cī lueel acäk ye muk wepuöth, rin cii wek wēt raan cī tooc ye gam.

39 “Athör Nhialic ayakë kueen, rin ye wek ye tak lön bäk pīr akölrüëc yök thīn. Ku keek aya aa jam ë rienkië!

40 Ku ŋot cäk wīc bäk bēn tēnē ya bäk pīr yök thīn.

41 “Acä wīc bī kōc ya leec.

42 Ku wek ŋiɛc, ku aŋiɛc lön tōu nhiēr Nhialic wepuöth.

43 Yēn aci bēn kek riɛl ë Wä, ku kuɛckë bäk ya lor, ku na bö raan dēt kek riɛlde ë rot ke yen abäk lor.

44 Anhiarkë bäk lɛc yök tēnē raan dēt, ku acäk ye them bäk lɛc yök tēnē Nhialic, ye kädē yen bī wek ya gam?

45 Ku emēn duökkë tak lön bī yēn we luəm tēnē Wä. Mothith guöp yen abī we luəm, ku ë Mothith yen acäk ŋööth wepuöth.

46 Na we cī Mothith gam alanden, ke wek ŋot we gam ya aya, rin cī yen wël göt ë rienkië.

47 Ku rin ye wek kuc gām wël cī göt, ke lëukë kädē bäk wël ca lëk we gam?”

6

*Jethu aci miëth koor juak bī kōc juëc cam
(Mt 14:13-21; Mk 6:30-44; Lk 9:10-17)*

¹ Ye tēēn ke Jethu tem wār Galilia cəl Tiberia aya.

² Go kōc juëc buöth rin cī kek kädīt jāŋ göi, cī yen kōc tuany kony tīŋ.

³ Go Jethu la göt nhom ku nyuuc kek kōcken ye buöth.

⁴ Ku yan kōc Itharel, Yan Ayum cīn yic luou ëcī thiök.

⁵ Nawën ciεeth Jethu piny ke t̄iŋ kɔc juēc ke bö tēnē ye, go Pilipo thiēēc, “Ye tēno bī yök miēth kueth kɔc ēbēn γɔɔc th̄in?”

⁶ Acī kēnē lueel ku bī Pilipo them, rin ŋic yen kē bī looi.

⁷ Go Pilipo bēēr, “Rin bī raan tōk ayum thin-nyɔt yök, ka w̄ic wēū juēc ap̄ei bī ayuöp γɔɔc.”

⁸ Go Andria, mēnh Thaimon P̄it̄er, ku ē ye raan tōk kam kɔcken ye buɔth lueel,

⁹ “Dh̄ɔk atō th̄in tēn ke muk ayuöp kadhiēc ku rec karou, ku aaciī kɔckä ēbēn bī lēu.”

¹⁰ Go Jethu lēk ke, “Calkē kɔc anyuc piiny.” (Ku noon ē d̄it th̄in ē tēēn. Go kɔc nyuc ēbēn piiny.) Ku rōör kepēc aake ye tēcit tēn tiim kadhiēc.

¹¹ Go Jethu ayuöp lööm ku leec Nhialic, ku tek ke tēnē kɔc wēn cī nyuc ēbēn. Ku ben looi kēya kek rec, bī raan ēbēn kueth cit tē w̄ic.

¹² Wēn cī kek kueth ēbēn, ke lēk kɔcken ye buɔth, “Kuanykē ab̄ek cī dōŋ piny, bī ciēn kē riääk.”

¹³ Gokē ke kuany ēbēn, ku thiōŋkē gäc thiäär ku rou ab̄ek ayuöp cī dōŋ piny, tēnē ayuöp kadhiēc wēn cī ke tēk kɔc bik cam.

¹⁴ Nawën t̄iŋ kɔc wēn luoi ril cī Jethu looi ke luelkē, “Kēnē ē raan kāk Nhialic t̄iŋ yen bī dhiel bēn pinynhom.”

¹⁵ Go Jethu jäl ŋic lɔn bī kek bēn bik ye bēn d̄am riel, ku loikē bī ya bēnyŋaknhom, go bēn dhuk gat nh̄im ē rot.

*Jethu aci cath p̄iu nh̄im
(Mt 14:22-33; Mk 6:45-52)*

¹⁶ Nawën cī piny cuəl, ke kɔcken ye buɔth la piny wär thok,

17 ku lek riäi yic, ku dhukkë ciëen wär alɔŋtui lɔŋ Kapernaum. Nawën ke wëër jəl yic dīt ke Jethu ɲot kəc bën tənë ke.

18 Kaam wën ke yomdīt jət rot ku loi atiaktiak rot apɛi.

19 Ku kɔcken ye buɔɔth, aake ye təcīt meel kadiäk ayi ɲuan wën tɪŋ kek Jethu ke cath pïu nhïim, ke bö tɛthiök kek riäi, gokë riöc apɛi,

20 Go Jethu lək ke, “Duökkë riäc, ee ɣɛn.”

21 Gokë jat riäi yic, ku go riäi guɔ yet wär thok tɛwën le kek thïn.

Kɔc aa wïc Jethu

22 Naɣɔn nhiäk ke tɪŋ kɔc ke cī dōŋ wär alɔŋtui, lɔn ë yen riän tōkaliŋ yen acī dōŋ. Ku aɲickë lɔn kəc Jethu la riäi yic kek kɔcken ye buɔɔth, ku aake cī jəl ë röt.

23 Go riëth kək ke bö Tiberia bën wär thok tɛthiääk ke tɛwäär ciɛm kɔc juēc ayup thïn, wën cī Bëny lɛc gam.

24 Nawën tɪŋkë lɔn liu Jethu thïn, ku liu kɔcken ye buɔɔth aya, gokë kɛɛc riäth yiic ku lek Kapernaum bīk Jethu la wïc.

Jethu ayum ë pïr

25 Nawën lek Jethu yök wär alɔŋtui ke lëkkë ye, “Raan piöc, ye nɛn bī yīn ë tən?”

26 Go Jethu bëër, “Wɛt yic alək we, wek aa wïc ɣa rin cī wek ayup cam təcīt tɛ wiëckë, ku acie rin cī wek luɔikiën ril deet yiic.

27 Duökkë lui rin miëth riääk, luöökë rin miëth rëer rin pïr akölriëc ëbën. Miëth kënë abī Manh Raan yiëk we rin Wun, Nhialic acī rielde gäm ye ku tooc.”

28 Gokë thiëc, “Buk nõ looi buk luoi wïc Nhialic looi?”

29 Go Jethu bëër, “Luoi wïc Nhialic bäk looi akïn, ë lön bäk wët raan cï tuöc gam.”

30 Gokë lueel, “Ye kïn riël nõ ba looi buk tïj ku buk wëtdu gam? Yenö ba looi?”

31 Wärkuan thëer aacä ayum löny nhial cam roor, cïmën cï ye göt athör thëer wël Nhialic yiic ëlä, ‘Ayum nhial acï yiëk ke bik cam.’ ”

32 Go Jethu lueel, “Wët yic alëk we, kë cï Mothith yiëk we acie ayum pan nhial, ee Wä yen ë we yiëk ayum yic bö pan nhial.

33 Rin ayum ye Nhialic gam ë yen raan bö piny pan nhial, ku yik thäi pinynhom pïr.”

34 Gokë thiëc, “Bëny, muoc ɣo ayum kënë akölaköl.”

35 Go Jethu lëk ke, “Yen ayum ë pïr,” Ku raan bö tënë ɣa acïi cök bi kañ nõk, “Ku raan gam wët dië acïi rou bi nõk.

36 Ëmën, aca lëk we lön cï wek ɣa tïj, ku aɲot këckë gam.

37 Raan ëbën cï Wä yiëk ɣa, yen abi bën tënë ɣa. Ku raan bi bën tënë ɣa acä bi cuɔp wei,

38 rin cï yen bën pan nhial ba wët raan toc ɣa bën looi, ku acie wët piändië.

39 Kë wïc raan toc ɣa ba looi akïn, bi ciën kë mär kam käk cï yiëk ɣa, ku ba ke jot ëbën aköl ciëen.

40 Rin kë wïc Wä akïn, lön raan ëbën tïj Wënde ku gem wëtde, abi pïr aköriëc ëbën yök thïn, ku keek aaba jot bik pïr ëbën aköl ciëen.”

41 Go kɔc Itharel luöpp guöpp rin cï yen ye lueel ëlä, “Yen ayum cï bën piny pan nhial.”

42 Ku luelkë, “Monyë cie Jethu wën Jothep? Wun ku man aa ñicku. Ku yeñö ye yen ye lueel lön cï yen bën piny pan nhial?”

43 Go Jethu bëër, “Duökkë lum kamkun.

44 Acïn raan lëu ye bï bën tënë ya tē kēc Wä ë toc ya ye thël yen, ku aba jöt bï pïr aköl ciëen.

45 Acï kəc kāk Nhialic tïñ gõt ëlä, ‘Kəc ëbën aabi Nhialic ke piöc.’ Raan ëbën piñ wët Wä ku piöc tënë ye ë bën tënë ya.

46 Ku acie rin nadë yen raan cï Wä kañ tïñ, raan bö tënë Nhialic, yeen ë rot, yen ë raan cï Wä kañ tïñ.

47 Wët yic alëk we, raan gam wët ala pïr alanden.

48 Yen ayum ë pïr.

49 Wärkun thëer aacä ayum löny nhial cam roor ku aaci thou.

50 Ku ayum bö piny pan nhial, yen acit kën na ciem raan ka cie bën thou.

51 Yen ayum ë pïr cï bën piny pan nhial. Raan cam ayum kënë, ka pïr akölrïëc ëbën. Ayum yen ba yiëk ye ë riëndië ya gam bï kəc ëbën pïr.”

52 Go kəc Itharel teer apëi kamken, ku thiëckë, “Lëu mony kënë kädë, bï riëndë yiëk yo buk cuet?”

53 Go Jethu bëër, “Wët yic alëk we, tē cï wek Manh Raan cuet ku dëkkë riemdië ka cïn pïr bäk yök wëikun yiic.

54 Raan cuet riëndië ku dek riemdië ala pïr alanden, ku abi jöt aköl ciëen bï pïr.

55 Rin riëndië ë miëth alanden, ku riemdië ë këdek alanden.

56 Raan cuet riëndië ku dek riemdië abi pïr yayic, ku yen abi pïr yeyic.

57 Wä p̄ir acä tooc, ku ë rin rienke yen ab̄i ɣen aya, ku këya raan cuet ɣen ab̄i p̄ir ë rienkië.

58 Ku yen k̄in ayum bö piny pan nhial, acii thön kek ayum c̄i wärkun theer cam ku lökkë thou. Raan cam ayum kënë ab̄i p̄ir akölr̄iëëc ëbën.”

59 Wëlkä aaci Jethu lueel wäär piöoc yen k̄oc t̄en amat Kapernaum.

Wël p̄ir akölr̄iëëc

60 Nawën piŋ k̄oc juëc ye buoath wëlkä, ke luelkë, “Piöoc kënë aril ap̄ei. Yen̄a lëu b̄i ke piŋ?”

61 Go Jethu ŋic l̄on j̄iem kek wël wën, ku lëk ke, “Wiëckë bāk jāl rin ë wëlkä?”

62 Yen̄o bāk looi t̄ë t̄iŋ wek Manh Raan ke dhuk nhial t̄ewën r̄ëer yen th̄in?

63 Ee Wëi Nhialic yen ë p̄ir gam, ku riel raan acin k̄ë ye kony. Wël ca lëk we aa wëi ku aa p̄ir.

64 Ku këya acii k̄oc k̄ök kamkun ye gam.” (Rin ëc̄i Jethu guo ŋic tuen̄ l̄on ye ȳiŋa c̄ii b̄i gam, ku yen̄a b̄i ye gaany.)

65 Ku ben lueel, “Ee rin wët kënë guöp yen alëk ɣen ye we, l̄on acin raan lëu ye b̄i b̄en t̄ënë ɣa, t̄ë këc Wä ye looi b̄i yic pial t̄ënë ye.”

66 Ku rin ë wëlkä, ke k̄oc juëc kam k̄oc ye buoath dhuk ciëen, ku cik ben cath kek ye.

67 Go Jethu atuöcke thiäär ku rou thiëëc, “Na week, wiëckë bāk jāl aya?”

68 Go Thaimon P̄iter b̄ëer t̄ënë ye, “B̄eny, buk la t̄ënë ŋa? Yin ala wël p̄ir alanden.

69 Ku ëmën acuk gam ku acuk ŋic l̄on ë ȳin raan dh̄eŋ bö t̄ënë Nhialic.”

⁷⁰ Go Jethu bëër, “Cie ɣen ɣa kuany we wathiäär ku rou? Ku raan tök kamkun anot ye jəŋrac.”

⁷¹ Yeen ë jam rin Judath, wën Thaimon Ithkariöt. Rin Judath, na cək alən ë yen raan tök kam atuöccke kathiäär ku rou, ka wïc bï ye luəm.

7

Jethu ku wämäthakën

¹ Wën ë wëlkä cök ciëën, ke Jethu kueny bëëi Galilia yiic, ku ë këc wïc bï la keny Judia, rin wïc bány Itharel tö Judia ye bik nök.

² Ku yan kəc Itharel cəl Yan Duël ëcï thiök.

³ Go wämäthakën lëk ye, “Jäl ë tən ku ləər Judia bï kəckun yï buəth luoidun ye looi tïŋ.

⁴ Acïn raan kë looi thiaan tē wïc yen ye bï ŋic apath. Rin ye yïn kakkä looi, ke yï cəl kəc pinynhom aa ŋic yï.”

⁵ Agut wämäthakën aakęc wëtde gam, yen aa lueel kek ye këya.

⁶ Go Jethu lëk ke, “Akäldië guöp anot këc yëët. Ku na ye we, ke kuat aköl ëbën apath.

⁷ Acïn tē bï kəc pinynhom we maan, ku keek aa man ɣa rin aya lueel, lən rɛɛc luəiken.

⁸ Lak yai yic, ku ɣen acï la ë yan kënë yic, rin aköldiën bï ɣen la akęc guə bën.”

⁹ Yeen acï jam këya ku jəl rëër pan Galilia.

Jethu ala Yan Duël yic

¹⁰ Nawën cï wämäthakën la yai yic, ke Jethu lök la aya, ku akęc la ke ŋic, yeen acï la ke mony rot.

¹¹ Ku bány Itharel aake wïc Jethu yai yic, ku thiëckë, “Tö monyë tənən?”

12 Ku aluəp ɛ dīt apɛi ɛ riɛnke. Aye kəc kək lueel, “Yeen ɛ raan path.” Ku lueel kəc kək, “Acie këya, yeen ɛ raan kəc dušöŋ.”

13 Ku acin raan ye jam ɛ riɛnke kəc nhïim, rin rišöc kek bāny Itharel.

14 Wën cī nīn abək yai thök, ke Jethu la kal luan Nhialic yic ku jəl kəc pišöc.

15 Go bāny Itharel gāi apɛi ku luelkë, “Ye raan këne kəŋ ŋic kədë ku akəc kaŋ pišöc.”

16 Go Jethu bëër, “Wël ya pišöc acie wëlkië aa wël bš bei tənë Nhialic, Aciëŋ cī ya tooc.

17 Raan wïc ye bī kë wïc Nhialic looi, abī ŋic lən nadë kë ya pišöc abš tənë Nhialic, ku acie riɛldië ɛ rot.

18 Raan jam riɛlde ɛ rot ɛ lɛc yen aye wïc, ku raan wïc lɛc tənë raan toc ye, yen ɛ raan path, ku acin ruëeny tš yepušu.

19 Kəc Mothith löŋ Nhialic nyuöth we? Ku acin raan löŋ theek kamkun. Yeŋö ye wek ye wïc bək ya nök?”

20 Go kəc juəc wën bëër, “Yin ala guöp jəŋrac, yeŋa wïc ye bī yī nök?”

21 Go Jethu bëër, “Kədīt jəŋ gš i tök aca looi guəkë gāi wedhie.

22 Mothith acī we thən bək miëthkun aa ŋoot, ku acie Mothith guöp yen cī wët këne jək, aa wärkun thɛɛr, ku këya wek a dhök ŋoot aköl cīi kəc ye luui.

23 Ku emən na ŋot dhök aköl cīi kəc ye luui rin bī löŋ Mothith cīi dhäl yic, yeŋö ye wek puöth riäak tənë ya, rin cī ɣen raan tök kony bī pial aköl cīi kəc ye luui?

24 Duökkē raan ye guo tēm awuöc wēt köu ayeer, yakē raan tēm awuöc wēt ë yic.”

Ye Jethu raan cī löc ku döc?

25 Go köc kök Jeruthalem lueel ëlä, “Cie raan kënë yen wickē bik nök.

26 Tiënkë! Yen kīn jam köc nhīim, ku acīn kē luelkē ë rienke. Tëdë, cīi bāny ηic lön ë yen Raan cī löc ku döc?

27 Na la Raan cī löc ku döc bēn, ka cīn raan bī ye ηic tē bī yen thīn, ku aηicku ëbēn yen tē bīi mony kënë thīn.”

28 Nawēn piöc Jethu luanη Nhialic ke lueel röldit, “Ee tēdë, wek aa ηic ya ku aηieckē yen tē bī yen thīn. Ku yen akēc bēn wētdië ë rot, ku yeen raan toc ya ala yic ku yeen akuöckē,

29 Ku yeen aηieç rin bī yen tēnē ye, ku yen acā tooc.”

30 Gokē wīc bik döm, ku acīn raan cī yecin tāäu yeguöp rin kēc akälde guo bēn.

31 Go köc juēc thān wēn yic wētde gam ku luelkē, “Tē bī Raan cī löc ku döc bī kädit jāη göi looi cīmēn ë raan kënë?”

Apuruuk aaci tooc bik Jethu la döm

32 Nawēn piη köc akut Parathī lön ye köc juēc wēn wēlkä loop kamken rin Jethu, ke keek ku bāny kāk Nhialic toc apuruuk luanη Nhialic tiit bik Jethu la döm.

33 Go Jethu lueel, “Yen abī rēer kamkun tēthin-nyöçt, ku yen abī la tēnē raan yen cā tooc.

34 Wek abā wīc, ku wek aaciī ya bī yök, rin acīn tē bī wek la tē rēer yen thīn.”

³⁵ Go bāny Itharel lueel kamken, “Bī la dā buk cīi ben yök? Cī bī la gæeth Gīrik yiic tē ciēŋ kəc Itharel thīn, ku bī kəc Gīrik pišöc?”

³⁶ Aye lueel, wek abā wīc ku wek aaciī ŷen bī yök, ku wek aaciī bī la tē rēer ŷen thīn, yeŋö wīc bī lueel?”

Kuēer pīu ē pīr

³⁷ Aköl ciēen yen aköl dīt nīn yai. Akölē, Jethu aci rot jət ku lueel röldīt, “Kuat raan nēk rou abī bēn tēnē ŷa ku bī dek.

³⁸ Cīmēn cī ye gət athör thæer wēl Nhialic yic ēlä, ‘Raan gam wētđiē, kuēer pīu ē pīr abī rēer yepušu.’”

³⁹ Kēnē aci Jethu lueel rin Wēi Nhialic, bī kəc gam wētde lək yök. Ku tēnē, Wēi Nhialic a kēc guə gam tēnē kəc, rin kēc Jethu guə la diεkde yic.

Kəc aaci keyiic tek

⁴⁰ Kəc kək kam kəc wēn aaci kēnē piŋ ku luelkē, “Raan kēnē ē raan kək Nhialic tiŋ alanden!”

⁴¹ Go kəc kək lueel, “Yen ē Raan cī ləc ku đəc!” Ku lueel kəc kək, “Raan cī ləc ku đəc aaciī bī bēn pan Galilia!

⁴² Aci gət athör thæer wēl Nhialic yic lən Raan cī ləc ku đəc abī ŷa raan dhiēnh Debit, ku abī dhiēeth Bethalem, gen wäär ciēŋ Debit thīn.”

⁴³ Go kəc wēn keyiic tek ē rienke.

⁴⁴ Ku wīckē bīk đəm, ku acīn raan cī yecin tāäu yeguəp.

⁴⁵ Nawēn dhuk apuruuk ciēen tēnē bāny kək Nhialic ku kəc akut Parathī, gokē ke thiēc, “Yeŋö kēc wek ye bēi?”

46 Go apuruuk bēēr, “Acīn raan cī kaŋ jam cīmēn ē mony kēnē!”

47 Go kəc akut Parathī ke thiēec, “Cī we duōŋ aya?

48 Le raan tōk kam bāny, ayī kam kəc akut Parathī cī wētde gam cāk kaŋ piŋ?

49 Kockā aa kuc lōŋ Mothith, ku aa kəc cī Nhialic lām kērac.”

50 Go raan tōk kam kəc akut Parathī, raan cī kaŋ la bī Jethu la tiŋ, cəl Nikodemo lēk ke,

51 “Na ye lōŋ ciεεŋ panda, ka cīn tē bī yok raan luək wei ke kēcku kaŋ piŋ thok tuēŋ, ku ŋicku kē cī looi.”

52 Gokē bēēr, “Yīin aya, ye raan Galilia? Kuen athör thēer wēl Nhialic, ku aba ŋic lōn acīn raan kāk Nhialic bēn Galilia.”

[
53 Nawēn cī raan ēbēn dhuk paande,

8

Tiŋ cī käl piny ke kər

¹ ke Jethu la gən Olip nhom.

² Nayon nhiäk dur yic ke dhuk luanŋ Nhialic. Go kəc ēbēn guēer yelōm, ku nyuuc piiny ku jək piöoc cök tēnē ke.

³ Go kəc piöoc lööŋ ku kəc akut Parathī tik bēēi, ku ē tiŋ cī käl piny ke kər. Ku cälkē akäac kəc nhūim ēbēn,

⁴ ku luelkē tēnē Jethu, “Raan piöoc, tiŋ kēnē aci käl piny ke kər.

⁵ Mothith acī lōŋ lək ɣo athör yic lön kuat tiŋ loi kəcit kënë, adhil biöök aleel bi thou. Na yīin emēn, ye lueel kədē?”

⁶ Keek aake jam kälä bik Jethu deep bik wēt yök bik la luom. Go Jethu guŋ ku gət piny yecin.

⁷ Nawēn ŋot ke kääc ku yekē thiëc, ke jət yeköu ku lək ke, “Na le raan kamkun cīn adumuööm cii kaŋ looi, ke biök alel tuenŋ yeguöp.”

⁸ Ku ben guŋ ku gət piny yecin.

⁹ Nawēn cik wēt kënë piŋ, ke jiël ebēn ke wath röt, ku kəŋ kəcdit jäl tuenŋ, agut tē döŋ Jethu ē rot, ku tiŋ wēn ke ŋot kääc yenhom.

¹⁰ Go yeköu jət ku lək ye, “Tökē tēno? Cīn raan cii döŋ bi yī luök wei?”

¹¹ Go bēēr, “Acīn raan Bēny.” Go Jethu lueel, “Apath, ke yīin acā bi luök wei aya. Ləor ku duk adumuööm ben looi.”]*

Jethu ee mermer pinyinhom

¹² Go Jethu ben jam tēnē kəc ku lueel, “Ÿen ē ruel pinyinhom, kuat raan buoth ɣa abī ruel pīr yök, ku acīi bi kaŋ cath muööth yic.”

¹³ Go kəc akut Parathī lək ye, “Emēn, yīn ajam ē rienku, ku wēt ca lueel acīn kē ye nyuöoth.”

¹⁴ Go Jethu bēēr, “Acie këya, na cək alon jīem ɣen ē rienkië, ke wēt lueel ē yic, rin ɣen aŋic tē bīi ɣen thīn. Ku wek aa kuc tē bīi ɣen thīn ayī tē ler ɣen thīn.

¹⁵ Wek aa wēt teem cīmēn wēt raan, ku ɣen acīn raan ya gām awuöc.

8:5 Leb 20:10; L.rou 22:22-24 * **8:11** Athör theer juëc aacie (7:53-8:11) ye mat thīn. Ku athör kök ee bēn Jn 21:24 cök, ku kök ē Lk 21:38. Ku athör tök ee lək bēn Jn 7:36 cök. **8:12** Mt 5:14; Jn 9:5 **8:13** Jn 5:31

16 Ku tē bī ʁen wēt teem, ke wēt ba teem abī jal a yic, rin acie ʁen tem wēt, Wä ē toc ʁen arëër ke ʁa.

17 Wēt aci göt löndun yic lön tē lueel kəc karou wēt tōk luk yic, ke wētden ē ya yic.

18 ʁen ajam ē rienkië, ku Wä cä tooc ajam ē rienkië aya.”

19 Gokë thiëc, “Tō Wuur tēno?” Go Jethu bëër, “Wek aaci ʁa ʁic, ku wek aaci Wä ʁic. Na we ʁic ʁa, ʁuöt wek aa ʁic Wä aya.”

20 Wëlkä ëbën aaci Jethu lueel wäär piöoc yen luan Nhalic, ʁön cī kākken ajuër tōu thīn. Ku acīn raan cie dām rin kēc akälde guə bën.

Wek aaci la tēdiën ler ʁen thīn

21 Go Jethu bën lëk ke, “ʁen abī jal ku wek abä wic, ku wek aabi thou awäckun yiic. Tē le ʁen thīn, acie yen tē bī wek la thīn.”

22 Tëwën, ke lueel bāny Itharel, “Aye lueel lön cīi ʁok bī la tē le yen thīn. Ye ciët bī rot nök?”

23 Go Jethu bëër, “Wek aa kəc piny tēn, ku ʁen ee raan bö nhal. Wek aa kəc piny kënë nhom, ku ʁen acie raan pinyhom tēn.

24 Ee rin kënë yen aci ʁen ye lueel lön bī wek thou adumuömkun yiic. Ku wek aabi thou adumuömkun yiic tē kēc wek ye gam, lön ē ʁen tō thīn, yen ē ʁen.”

25 Gokë thiëc, “Ye yīn ʁa?” Go Jethu bëër, “Wēt aca lëk we tēwën jəc ʁen wēt cök.†

26 ʁen ala wël juëc ba ke lueel ē rienkun, ku wël juëc bī ʁen ke we luök wei. Ku raan cä tooc guöp ala yic, ku ʁen ē kəc lëk kuat kē ca piŋ tēnē ye.”

27 Gokë kēc deet lön jiem Jethu wēt Wun.

† 8:25 Yenö ben ʁen jam tēnē we.

28 Go Jethu ben lueel tēnē ke, “Aköl bī wek Manh Raan jat nhial, ka bāk jāl njic lōn, ‘Yen tō thīn Yen ē Yen.’ Ku abāk deet yic aya lōn acīn kē ya looi ruətdiē, ku aa ya ke lueel wēl cī Wā pišōc tēnē ya.

29 Ku raan cā tooc arēēr ke ya, ku akēc ya nyāān piny yatök, rin ye yen wēt nhiēr looi akōlaköl.”

30 Go kəc juēc cī Jethu piñ ke jam ē wēlkā wētde jāl gam.

Kəc lääu nhīm ku kəc aloony

31 Go Jethu lək kəc Itharel cī wētde gam, “Na piēnkē wēl ca pišōc, ke wek aa kəcckien buəth ya ayic,

32 ku wek aabī yic njic, ku yic abī we wēēr bei.”

33 Gokē bēēr, “Yok aa kəc dhiēnh Abaram, ku acīn kəc kək cī yo kan loony. Ku na luel, ‘Wek aabī wēēr bei,’ ke yeñō wic ba lueel?”

34 Go Jethu lək ke, “Yic alək we, raan ēbēn cā adumušm looi yen alony adumušm.

35 Alony acie raan mac thok alanden, ku Wāt yen ee raan thīn lanayōn.

36 Na cī Wāt we wēēr bei, ke wek aabī rēēr ke cīn loony alanden.

37 “Anjiec lōn ye wek dhiēn Abaram. Ku aņot wiēcckē bāk ya nök, rin pišōcdiē acäk ye gam.

38 Kē cī Wā nyuəth ya yen aya lueel, ku wek aa loi kē cī wärkun lək we.”

39 Gokē bēēr tēnē ye, “Abaram yen ē wāda.” Go Jethu wēt dhuk nhom ku lueel, “Na we mīth Abaram alanden, nūšt wek aa loi kēcīt kē cī Abaram looi.

40 Këriëc ebën ca looi ë rin ba we lëk yiny ca piñ tënë Wä, ku aṇot wiëckë bäk ya nök. Abaram acin kë cī looi cīt kënë!

41 Wek aa loi kë cī wärkun looi.” Gokë lueel, “Nhialic yetök yen ë Wäda, ku yok aa miëthke guöp.”

42 Go Jethu bëër tënë ke, “Të ye Nhialic wuurdun guöp, ṇušt wek nhiaar ya, rin cī yen bën tënë Nhialic, ku emën yen atö tën. Yen akëc bën wëtdië ë rot, ee yen acä tooc.

43 Yenö cīi wek kë ya lueel ye deet yic? Ee rin cīi wek ye lëu bäk wëtdië piñ.

44 Ee jṇrac yen ë wuurdun, ku ayakë nhiaar bī ya kën wuurdun yen yakë looi. Yen ë raan ë tir tēthēr ṇṇ, ku akëc yic kaṇ lueel rin ye yen alueeth, ku ye wun lueth ebën.

45 Yen aluel yic, ku rin ë kënë yen akëc wek ya gam.

46 Yenṇa kamkun lëu ye bī awuöc nyooth yaguöp rin adumuööm ca looi? Na lueel yic, ke ye rin ṇö cīi wek ya ye gam?

47 Raan bö tënë Nhialic ë wët Nhialic piñ, wek aacīi bö tënë Nhialic, ku yen ë kë cīi wek wët bī piñ.”

Jethu ku Abaram

48 Go kṇc Itharel bëër tënë Jethu, “Këcku wët yic lueel wën lṇn ë yin raan pan Thamaria, ku jṇrac atö yiguöp?”

49 Go Jethu bëër, “Acin jṇrac tö yaguöp, yen ë Wä theek ku wek aa ya dhöl guöp,

50 Yen acīi læcdië wic. Raan wic ye atö thīn, ku ë wët teem bā kony.

51 Wēt yic alëk we, raan piŋ wētdië aciï bi thou akölrïëëc ëbën.”

52 Go kəc Itharel lëk yen. “Ëmën, aŋicku alanden lən tō jəŋrac yīgüöp. Abaram aciï thou, ku kəc kək Nhialic tiŋ aciï thou aya ku ŋot ye lueel, ‘Raan piŋ wētdië aciï bi thou akölrïëëc ëbën.’

53 Abaram wāda aciï thou, nadë ye lueel lən diit yin tənë Abaram? Ku kəc kək Nhialic tiŋ aciï thou aya. Ye tak ye yin ë ŋa?”

54 Go Jethu bëër, “Na ɣa cï rot leec, ŋuöt ləc kënë acie ləc aciï. Ee Wā yen ë raan ɣa leec, ku yeen guöp ayakë lueel ke Nhialicdun.

55 Yeen akëckë kaŋ ŋic, ku yeen aŋיע. Na lueel lən kuc ɣen ye, ke ɣen abi ya alueeth cïmëndun, ku yeen aŋיע, ku ɣen ë wētde looi pušu ëbën.

56 Wuurdun Abaram aciï pušu miët apei lən bi yen aköl bëndië tiŋ, aciï tiŋ ku aciï pušu la yum.”

57 Go kəc Itharel lëk ye, “Yin aŋot yi këc ruöön thiärdhiëc dööt, ku yin ca Abaram tiŋ?”

58 Go Jethu bëër, “Wēt yic alëk we, wäär këc Abaram guö dhiëëth, ‘Ke ɣen atö thïn.’ ”

59 Gokë aleel kuany bi kek ye biöök, go Jethu rot thiaan ku jiël yön Nhialic.

9

Jethu aciï raan cï dhiëëth ke cï cöör kony

1 Tëwën ciëth Jethu, ke tiŋ raan cï dhiëëth ke cï cöör. Go kacken ye buöoth thiëëc,

2 “Raan piööc, ye adumuööm cï ŋa looi cəl ye adhiëth ke cï cöör? Ye adumuöömde aye adumuööm kəc ke dhiëth ye?”

³ Go Jethu bëër, “Kë cī yen cəər acie rin adumuössm cī looi, ayī rin adumuössm cī kəc ke dhiëth ye looi, yeen aci cəər bī riel luoi Nhialic tñj yeguöp.

⁴ Ȳok aa dhil la tuenȲ Ȳo lui luoi raan cā tooc Ȳet tē Ȳot ruel aköl, waköu abö, ku acin raan bī ye lëu bī luui.

⁵ Ȳet aköl Ȳoot Ȳen pinynhom, ke Ȳen ë ruel tənë kəc.”

⁶ Tëwën cī yen jam këlä, ke Ȳuut piny ku nueen tiöp luëeth, ku rəoth tiöp mony wën nyin,

⁷ ku lëk ye, “Ləər lək yīnyin wär Thiloam.” (Ku wëtde yic, “Cī tooc.”) Go mony wën la ku lək yenyin, ku le dhuk ke ye piny tñj.

⁸ Go kəc akeu nhom ku kəc cī ye kaȲ tñj ke līm thiëc, “Cie mony dhie cool nyuc piiny ke līm kënë?”

⁹ Go kəc kək lueel, “Ee yeen guöp.” Ku lueel kəc kək, “Acie ye ë raan thöȲ kek ye.” Go mony wën nhom lueel, “Ee Ȳen raan wën guöp.”

¹⁰ Gokë thiëc, “Cī rot lëu kädë ba bën daai?”

¹¹ Go bëër, “Mony cəl Jethu aci tiöp nueen ku rəoth Ȳanyin ku lëk Ȳa, ‘Ləər wär Thiloam ku lək yīnyin.’ Guo la, ku kaam wën lək Ȳen Ȳanyin, ke Ȳa tñj piny nyin yic.”

¹² Gokë thiëc, “Ȳen ako?” Go bëër, “Akuśc.”

Akut Parathī awïc wët tē cī cəər kuəny thīn

¹³ Gokë mony wën cī cəər thəl tənë kəc akut Parathī.

¹⁴ Aköl nueen Jethu tiöp ku rəoth raan nyin bī daai, ee ya aköl cīi kəc ye luui.

¹⁵ Go kəc akut Parathī mony wën bën thiëc tē cī ye liëp nyin thīn. Go lëk ke, “Ȳeen aci tiöp tääu Ȳanyin, ku laak Ȳanyin, ku ëmën alëu ba piny tñj.”

16 Go kəc kək akut Parathī lueel, “Raan cī kēnē looi aciī lēu bī bēn tēnē Nhialic, rin aci lōj cīi kəc ye luui thek.”

Go kəc kək lueel, “Lēu kēdē bī raan la guōp adumuōōm kādīt jāŋ gōi, cīt kākka, looi?” Gokē keyiic tek kamken.

17 Go kəc akut Parathī mony wēn bēn thiēēc, “Yīin ye lueel lōn cī yen yī liep nyin apath, ku yīin ye lueel ye yen ŋa?” Go bēēr, “Ee raan kək Nhialic tīŋ.”

18 Ee kēc bāny Itharel gam lōn cī yen cōr ku ben nyin kuek, agut tē bī kek kəc ke dhiēth ye cōl,

19 ku thiēckē ke, “Ye manhduon kēnē? Ayakē lueel lōn cī ye dhiēth ke ye cōr, lēu kēdē, bī piny tīŋ?”

20 Go wun ku man bēēr, “Aŋicku lōn ye yen man-hda, ku lōn cī ye dhiēth ke ye cōr.

21 Ku akucku tē cī yen piny jāl tiēŋ thīn, ŋok aa kuc raan cī ye liep nyin aya. Thiēckē, yeen aci dīt ku alēu bī kēde bēēr ē rot.”

22 Wun ku man aaci jam kēlā rin riōc kek bāny Itharel, rin cī kek ye mat lōn kuat raan gam Jethu lōn ē yen Raan cī lōc ku dōc, ka dhil cuōp wei tēn amat kəc Itharel.

23 Rin kēnē, yen ē lueel wun ku man ye ēlā, “Yeen aci dīt, thiēckē!”

24 Gokē mony wēn cī dhiēth ke cī cōr bēn cōl arak dēt, ku lēkkē ye, “Kuēēŋ ē Nhialic nhom lōn bī yīn yic lueel. Aŋicku lōn mony kēnē ē raan adumuōōm.”

25 Go mony wēn bēēr, “Akuōc lōn ye yen raan la guōp adumuōōm, wēt yen ŋiēc, ŋen a ŋa ye cōr ku ēmēn ŋen ē piny tīŋ.”

26 Gokē thiēēc, “Yenō cī looi tēnē yīn? Cī nyiēnku kuek kēdē?”

27 Go bēēr, “Aca lēk we wēnthēer, ku acāk ye piŋ. Ye rin ŋō wīc wek wēt bāk bēn piŋ? Tēdēt wiēckē aya bāk ya kōcken ye buōth?”

28 Gokē lat ku luelkē, “Yin aci ya raanden ye buōth, yok aa kōc Mothith.

29 Aŋicku lōn cī Nhialic jam tēnē Mothith, ku na ye monytui, ka cōkku kuc aya tē bīi yen thīn!”

30 Go mony wēn bēēr, “Kē gēi kōc akīn! Akuōckē tē bīi yen thīn, ku yeen guōp aci nyiēnkiē liep!

31 Aŋicku lōn cīi Nhialic wēt kōc adumuōōm ye piŋ, ku yeen ē wēt kōc thek ye ku loikē luōiden cī lēk ke piŋ.

32 Yōnthēer cēk pinynhom akēc kaŋ piŋ lōn le yen raan cī dhiēēth ke ye cōr cī kuek nyin.

33 Na cie lōn bīi raan kēnē tēnē Nhialic, ka cīi lēu bī kēcīt kēnē looi.”

34 Gokē bēēr, “Yin aci dhiēēth ku muk yī adumuōōm yic, ku wīc ba yo piōōc?” Ku copkē wei tēnē amat.

Cōōr ē puōu

35 Go Jethu piŋ lōn cī kek ye cuōp wei. Nawēn yōk ke luel, “Ye wēt Manh Raan gam?”

36 Go mony wēn bēēr, “Bēny, lēk ya ye ŋa, rin ba lēu ba gam.”

37 Go Jethu lēk ye, “Yeen aca tīŋ, ku yen ē raan jam kek yī ēmēn.”

38 Go mony wēn luel, “Bēny aca gam.” Ku gut yenhiōl piny Jethu nhom.

39 Go Jethu luel, “Yēn aci bēn pinynhom tēn ba wēt teem, rin bī cōr piny tīŋ, ku bī kōc piny tīŋ jāl cōr.”

⁴⁰ Go kɔc kɔk akut Parathī rēēr kek ye wël cī lueel piŋ ku thiëckē, “Ee ciēt wïc ba lueel lɔn ye ɣok cōör aya?”

⁴¹ Go Jethu bēēr, “Na we ye cōör ke wek aa cīn gup awuɔc, ku rin ye wek ye lueel lɔn ye wek piny tīŋ, ke wēt kēnē aye nyooth lɔn le wek gup awuɔc.”

10

Kääŋ abiöök

¹ Go Jethu lueel, “Wēt yic alëk we, raan cie tēek kal amël thok, ku lir nhom tēdēt, yeen ë cuär, ku ë raan rum kãŋ.

² Ku raan tēk kal thok yen abiöŋ amël.

³ Raan tit kal abī kal ŋaany thok tēnē ye, ku piŋ amël rölde tē cɔal yen amälke ë rienken, ku thel ke ayeer.

⁴ Ku tē cī ke ɣäth ayeer, ka cath tuenŋ kenhīim ku buɔth amël cök rin ŋic kek rölde.

⁵ Aacīi raan dēt bī buɔth cök, aabī kat ye rin kuc kek rölde.”

⁶ Kääŋ kēnē acī Jethu thäth ke, ku wēt lueel tēnē ke akëckē deet yic.

Jethu abiöŋ path

⁷ Go Jethu bēn lueel, “Wēt yic alëk we, ɣen ee kal thok tēnē amël.

⁸ Kɔc kɔk ëbēn cī kaŋ bēn ɣanhom tuenŋ, aa cuär ku aa kɔc rum kãŋ, ku röldeŋ akëc amël piŋ.

⁹ ɣen ë kal thok. Raan bö thīn thuɔŋdië abī luɔk, yeen abī bēn alɔŋthīn ku ler ayeer, ku yök wël path.

¹⁰ Cuär ë bēn rin bī cuëer, ku nëk kãŋ ku rɛc ke. ɣen acī bēn bīk pīr yök, pīrdīt alanden.

11 “Ÿen abiön path. Abiön path aye wïc bï thou rin amälke.

12 Raan lui ariöp ku cie raan abiöök ku cie wun amël, ku tïñ gəl ke bö, ka päl amël ku ket, bï gəl thuεet amël yiic ku thiëi ke roor.

13 Raan lui ariöp ë kat rin ë raan lui ariöp ë path, ku aliu pušu kegup.

14-15 “Ÿen abiön path. Cïmën ñic Wä Ÿen ku ñic Wä, këya Ÿen añic amälkië ku amälkië aa ñic Ÿa. Ku awiëc ba thou ë rienken.

16 Amël kök aa tő thïn ku aa käkkië ku aa liu thïn kal kënë yic. Keek aaba bëëi aya, ku aabi röldië piñ, ku keek aabi ya luşny tökaliñ kek raan tönj biöök ke.

17 “Wä anhiar Ÿa rin awiëc ba piërdië puşl rin bï Ÿen ye ben yök.

18 Acïn raan bï piërdië nyaai tënë Ÿa. Yeen aya puşl wët piändië ë rot. Ÿen ala riel ba päl wei, ku Ÿen ala riel ba ben lööm.”

19 Go kəc Itharel keyiic ben tek kamken rin ë wëlkä.

20 Kəc juëc kamken aa yekë lueel, “Yeen ala guöp jəñrac! Yeen amuşl! Yenjö ye wek wëlke piñ?”

21 Go kəc kök lueel, “Lëu raan la guöp jəñrac bï jam cïmën yen! Lëu jəñrac kädë bï cəor cəl akuek yenyin?”

Kəc Itharel aa kuec Jethu

22 Aköl looi Yan Dəc luanj Nhialic Jeruthalem aci bën, ku piny ë ye mëi.

23 Ku Jethu ë cath puək yic, cəl puək Tholomon tő luanj Nhialic.

24 Go kɔc Itharel guëer yelööm ku luelkë, “Ÿet nen bi yin yo cɔl arëer yo diu puøth? Lëk yo yic la gei, ye yin Raan ci lɔc ku dɔc?”

25 Go Jethu bëer, “Wët aca lëk we ku wek aacie wëtdië ye gam. Luøikiën ya looi ë riel Wä, kek ajam ë riënkië.

26 Ku wek aacie wëtdië ye gam rin cii wek ye amälkië.

27 Amälkië aa röldië piŋ ku keek aŋiɛc ku keek aa ya buøth cök.

28 Pïr akölrïëc ëbën aya yiëk ke, ku keek aacii bi kaŋ thou athëer, ku acin raan lëu ye bi ke rum tënë ya.

29 Kë ci Wä yiëk yen awär këriëc ëbën, ku acin raan lëu ye bi ke rum Wä cin.

30 Wä ku yen yok aa tök.”

31 Go kɔc Itharel aleel ben kuany bik biöök.

32 Go Jethu lëk ke, “Luøi puøth juëc ci Wä yiëk yen ba ke looi, aa ca looi wenhïim, ye luøi töŋ nen kamken yen wïc wek ye bäk ya biöök aleel?”

33 Go kɔc Itharel bëer, “Yin acuk wïc buk yi biöök aleel rin luøi path, ku ë rin ye yin Nhialic dɔl guöp. Yin ë raan ë path, ku wïc ba rot looi ba ya Nhialic!”

34 Go Jethu bëer, “Acï göt löŋdun yic guöp lɔn ci Nhialic ye lueel, ‘Wek aa Nhialic.’

35 Aŋicku lɔn wët ci göt athör wël thëer Nhialic yic ë yic alanden, ku kɔckä acï Nhialic cɔl, ‘Nhialic,’ kɔc ci Nhialic thön wëtde.

36 Ku na yen, ke Wä cä cɔl ku tuuc ya pinyhom, ku ye kädë ye wek ye lueel lɔn ci yen Nhialic dɔl, ye rin ci yen ye lueel lɔn ye yen Wën Nhialic?

37 Duökkë wëtdië gam të cii yen luøi Wä loi.

38 Ku na ya ke looi, ku cək alon cii wek wətdië gam, ke we dhil luəikië gam, bək ɲic alanden lon Wä arëër kek ya ku ɣen atö Wä yic.”

39 Gokë wïc bïk dəm, go ke käl nyïn.

40 Go Jethu bən dhuk ciëen wär Jordan alontui tēwäär ye Joon kəc muəoc nhïim thïn, ku rëer thïn tēën.

41 Go kəc juëc bën tənë ye ku luelkë, “Joon akëc kārıl looi, ku kəriëec ëbën cï lueel rin ë mony kënë aaci ya yith.”

42 Ku gam kəc juëc wətde ë tənë.

11

Thon Ladhäro

1 Raan cəl Ladhäro, ku ë rëer Bethani, ëcï tuaany. Bethani ë gen rëer Maria thïn kek nyankën cəl Martha.

2 Maria kënë yen ë nyan wäär cï Bänyda təc cök miök ɲir, ku wuuny ke nhiëmke. Ku ë mēnhë Ladhäro yen ëcï tuaany.

3 Go nyiërakën wət tuəc Jethu, “Bëny, mäthdun nhiar aci tuany.”

4 Nawën piɲ Jethu ke lueel, “Tuëny kënë acii Ladhäro bi nök, kënë aci rot looi bi Nhialic leec thïn. Ku yen ë tē bi Wën Nhialic ləc yök thïn.”

5 Ku Jethu ë nhiar Martha kek nyankën ku Ladhäro.

6 Nawën cək piɲ lon cï Ladhäro tuaany, ke näk nïn karou tēwën rëer yen thïn.

7 Ku jəl lək kəc ye buəoth, “Benku dhuk ciëen pan Judia.”

⁸ Go kɔc ye buõth lueel, “Raan piöc, wäär emën thiök, ee wïc kɔc Itharel bik yï biöök aleel, ku ye wïc emën ba ben dhuk thïn?”

⁹ Go Jethu bëer, “Akäl tök ci yic la aköl ku waköu? Të cieth raan ke ruel dît ke yeen acie köth, rin ala ruel yen piny tïj.

¹⁰ Ku na cieth waköu ka köth, rin liu ruel tënë ye.”

¹¹ Jethu aci wëlkä lueel ku met dët thïn, “Mäthda Ladhäro aci nïn wit, ku yen ala ba la puöc.”

¹² Go kɔc ye buõth lueel, “Bëny, na ci nïn ka bi ñuëñ.”

¹³ Ku wët wïc Jethu bi lëk ke ë lɔn ci Ladhäro thou. Gokë tak lɔn jiem yen wët nïn ë path.

¹⁴ Go Jethu gai yic tënë ke, “Ladhäro aci thou,

¹⁵ ku yen aci puöu miët ë riɛkun ba këc rëer kek ye, rin bäk gam. Jɔlku la tënë ye.”

¹⁶ Go Thomath, cɔl Acueek, lëk atuuc, “Lokku yodhie kek Raan piöc, rin buk la thou kek ye.”

Jön rot ku pïr aabö tënë Jethu

¹⁷ Nawën yet Jethu ke yök lɔn ci Ladhäro thiök ka la nïn kanuan ran yic.

¹⁸ Bethanï amec kek Jeruthalem təcit tën meel karou,

¹⁹ ku kɔc juëc Itharel aake ci bën bik Martha kek Maria bën dæt puöth, rin wämênhden ci thou.

²⁰ Nawën piñ Martha lɔn biï Jethu, ke la ayeer bi la röm kek ye, ku dön Maria bei.

²¹ Go Martha lëk Jethu, “Bëny, na yï tö thïn, ñuöt wämääth akëc thou.

²² Ku anjic lɔn na cök amën ke Nhialic abi këriëc ëbën ba thiëc ye, gäm yï.”

²³ Go Jethu lëk ye, “Wämuuth abi rot jot bi pïr.”

24 Go Martha bëër, “Anjɛc lɔn bī yen rot jɔt bī pīr aköl ciëen.”

25 Go Jethu lëk ye, “Yɛn ë jɔn rot ku pīr. Raan gam wët dië, na cɔk alɔn thou yen ka bī pīr.

26 Ku kuat raan pīr ku gɛm wët dië acii bī kan thou. Ca kënë gam?”

27 Go lueel, “Ee këya, Bëny. Aca gam lɔn ye yīn Raan cī lɔc ku dɔc, Wën Nhialic, bī dhiel bën pinynhom.”

Jethu adhiau

28 Nawën cī Martha wëlkä lueel, ke dhuk ciëen ku cɔl nyanakën Maria amäath ku lueel, “Raan piöc atö tɛn ku awic yī.”

29 Nawën piŋ Maria wët kënë, ke jɔt rot ku lɔc la ayeer bī la röm kek ye.

30 Ku Jethu ë ɲot këc yet baai, a ɲot rëër tɛwën rɛm yen thīn kek Martha.

31 Go kɔc Itharel wën rëër yööt kek Maria rin bīk dɛɛt puşu, buɔth cök, wën tīŋ kek ye ke cī rot jɔt ku bɛn yeköu ayeer. Ee cīk tak lɔn ler yen ran nhom bī la dhiau thīn.

32 Wën yeet Maria tɛwën rëër Jethu thīn, ke cuet rot piny yecök ku lueel, “Bëny, na yī tō thīn tɛn ɲuöt wämäath akëc thou.”

33 Nawën tīŋ Jethu ke dhiau, ku kɔc Itharel awën ruɛc ye ke dhiau aya, go keŋ yepuşu ku ɲeer yic apɛi.

34 Go ke thiëc, “Cäk thiök tɛno?” Gokë lueel, “Bëny, bäär ba tīŋ.”

35 Go Jethu dhiau.

36 Go kɔc Itharel lueel, “Tiëŋkë tɛ nhiɛer yen ye thīn.”

³⁷ Go kɔc kɔk kamken lueel, “Acì raan cì cɔər liep nyin, kɛc looi? Ku yenjɔ kɛc yen Ladhäro kuɔny bei thou yic?”

Ladhäro acì bɛn p̄r

³⁸ Go Jethu yic bɛn ηεεr apɛi ku ler ranj nom, ku ranj ɛci wɛc kuur yic, ku kuurdit acì tääu yethok.

³⁹ Go Jethu ke yöök, “Nyaaikè kuur.”

Go Martha, nyanakɛn raan cì thou bɛɛr, “Bɛny, acì nhiany. Nin cì ye thiök aa ηuan.”

⁴⁰ Go Jethu lɛk ye, “Kɛc lɛk yì lɔn bī yin lɛc Nhialic t̄ij tɛ gɛm yin?”

⁴¹ Gokè kuur laar wei. Go Jethu yenyin ηäär nhial ku lueel, “Wä yin alɛɛc rin ye yin ya piŋ,

⁴² ku aŋɛc lɔn ye yin ya piŋ akölaköl, ku aluɛl rin bī kɔc tɔ thin tɛn ye gam, lɔn cì yin ya tooc.”

⁴³ Kaam wɛn cì yen wɛlkä lueel ke cöt röldit, “Ladhäro, bäär ayeer.”

⁴⁴ Go bɛn ayeer ke cì duut cök ku cin alanh thiëkthiëk, ku acì der nyin alath. Go Jethu lɛk ke, “Däkkè ku calkè acath.”

Amat nɛk Jethu

(Mt 26:1-5; Mk 14:1-2; Lk 22:1-2)

⁴⁵ Go kɔc juɛc Itharel cì bɛn b̄ik Maria bɛn neem, kè cì Jethu looi t̄ij, ku gamkè wɛtde.

⁴⁶ Ku dhuk kɔc kɔk ciɛn kamken tɛnɛ kɔc akut Parathī, bik kāk cì Jethu looi la lɛk ke.

⁴⁷ Go kɔc akut Parathī ku kɔc kāk Nhialic mat kek bɛny luk, ku luelkè, “Buk ηɔ looi? Mony kɛnɛ ee luoi ril apɛi looi!

⁴⁸ Na pälku bī la tuenj kɛlä, ke kɔc ɛbɛn abī wɛtde gam, ku bäny Roma aabī bɛn b̄ik luanj Nhialic thuör piny ku rɛckè panda.”

49 Go Kaipa yen ye raandit kɔc kāk Nhialic ë rušön kënë lueel, “Wët tök akuöckë!

50 Cäk ye tiŋ lön anuëën tēnē we bī raan tök thou rin kɔc, tēn tē bī wušnda riääk ëbēn?”

51 Ku akēc wët kënë lueel piände ë rot, ku ë rin ye yen raandit kɔc kāk Nhialic ë rušön kënë. Ku ë luel kāk tuen bī röt looi lön bī Jethu thou rin thän Itharel,

52 Ku acie rienken kepēc, abī thou aya bī mīth Nhialic cī thiēi pinynhom kušöt yiic bīk aa tök.

53 Joök aköl kënë ke bāny aake guir bīk Jethu nök.

54 Kēya, go Jethu kēc bēn acath ë path kam kɔc pan Judia, ku jiël bī la gen cɔl Epraim tēthiök ke ror, ku rēer thīn kek kɔc ye buəəth.

55 Ku Yan Ayum cīn yic luəi kɔc Itharel ëcī thiök, go kɔc juēc jāl bääiken yiic bīk la Jeruthalem, bīk kōc wuuny kek kegup yandit nhom tuen la looi.

56 Gokē Jethu wic, ku thiëckē röt kamken wēn cī kek guēr luan Nhialic, “Yeŋö yakē tak? Bī bēn yai yic, kua cīi bī bēn?”

57 Ku kɔc kāk Nhialic ku kɔc akut Parathī aake cī wët lueel, lön raan ŋic tē rēer Jethu thīn adhīl wët lēk ke, ku bī dām.

12

Maria acī tē theek yen Jethu thīn nyuəəth

(Mt 26:6-13; Mk 14:3-9)

¹ Nīn kadātem Yan Ayum cīn yic luəu nhom tuen, ke Jethu la Bethanī, pan ciēŋ Ladhāro thīn, raan wäär cī jöt bei thou yic.

² Gokē miēth guir tēnē ye, miēth cī Martha bēn luui thīn apēi. Ku Ladhāro atō kam kɔc ke rēer thīn aya.

³ Go Maria karjac cī thiāŋ miök n̄ir cəl naar, ye ɣəɔc wēəu juēc lööm, ku puk Jethu cök ku wuuny nhimken nom. Go an̄ir miök ɣöt rum yic ebën.

⁴ Go raan tök kam kəc Jethu buəθh, cəl Judath Ithkariöt, raan bī ye luəm lueel,

⁵ “Yenjö kēc miök n̄ir kënë ɣaac wēəu juēc wär wēəu ye döm raan tök, ku yik ke kəc n̄əŋ?”

⁶ Ku ecie rin nhiēr kəc n̄əŋ yen lueel yen kënë, ee rin ye yen cuär, ee ye wēəu akut muk, ku ë ye rot kony th̄in.

⁷ Go Jethu lueel, “Pälkē, calkē amuk miök rin aköl bī ɣa thiök.

⁸ Kəc n̄əŋ aabī rēer th̄in akölaköl kek we, ku ɣen acii bī rēer kek we akölaköl.”

⁹ Go kəc juēc Itharel jäl n̄ic lən t̄ö Jethu Bethanī, gokē la th̄in, ku acie rin Jethu yetök, ee rin bik Ladhäro la t̄iŋ aya, raan wäär cī Jethu jət kam kəc cī thou.

¹⁰ Go kəc kək Nhialic wēt mat yic bik Ladhäro nök aya,

¹¹ rin wēt Ladhäro yen aye kəc juēc Itharel bānyken puöl ku gamkē wēt Jethu.

Jethu aci la Jeruthalem ke ciēm yai

(Mt 21:1-11; Mk 11:1-11; Lk 19:28-40)

¹² Nəɣon nhiääk dēt ke akutdīt kəc cī bēn Yan Ayum c̄in yic luəu yic, piŋ wēt lən bii Jethu Jeruthalem.

¹³ Gokē ayör agəp lööm, ku lek bik la lor, ku ketkē elä,

“Ləc tēnē Nhialic!
Nhialic dəc raan bö rin Bēny!

Nhialic dɔc Bëny Itharel!”

¹⁴ Go Jethu akaja yök ku nyuuc yeköu, cīt tē cī gät ye athör thæer wël Nhialic yic,

¹⁵ “Duökkë riöc kɔc Itharel! Yen kïn, Bändun abö, ke cī nyuc akaja köu.”

¹⁶ Ku kakkä aake këc kacken ye buo̯th deet yiic, nawën cī Jethu rot jət ke læc, ke jolkë ñic lɔn cī kakkä gät athör thæer wël Nhialic yic, ku lɔn cī kek kakkä looi tënë ye.

¹⁷ Ku kɔc juëc ke rëer thïn wäär cī Jethu Ladhäro caal ayeer ran yic, ku jət kam kɔc cī thou, aake kë cïk tïj tët kɔc.

¹⁸ Ku rin wët kënë aya yen aa lor kɔc juëc ye, rin cī kek luoidit jän göi cī looi piñ.

¹⁹ Go kɔc akut Parathï lueel kamken, “Cäk ye tïj lɔn cïn yen kë yökku thïn. Tiëñkë, aye thëi ebën buo̯th cök.”

Kɔc Gïrik kök aa wïc Jethu bik tïj

²⁰ Kɔc Gïrik kök aake tö kam kɔc cī la Jeruthalem bik Nhialic la door thïn.

²¹ Gokë bën tënë Pilipo, raan Galilia pan Bethaida ku luelkë, “Bëny, yok aa wïc Jethu buk tïj.”

²² Go Pilipo wët lëk Andria, ku lekkë karou tënë Jethu bik la lëk ye.

²³ Go Jethu bëer, “Emën, aköl bi Manh Raan ya leec apai aci guo̯ yëet.

²⁴ Wët yic alëk we, nyin rap ë rëer ke ye tök ë path, tē këc ye tääu tiop yic bi ciët kë cī thou. Na le yic pät bi ciët kë cī thou, ka jəl luok mïth juëc.

25 Raan nhiar piërde, abï muør ku raan man piërde pinynhom tèn abï muk tènë pïr akölrïëc ëbën.

26 Kwat raan wïc ye bï yen luöïi ka dhil ya buoath cök, rin tē rëer yen thïn, aluonydië abï rëer thïn aya, ku Wä abï kwat raan luui ya leec.

Jethu ajam wët Thuonde

27 “Piändië arem ëmën, ku ba nõ lueel? Ba lueel, ‘Wä, duk kërec tit ya cöl abö?’ Ku kënë ë yen cï yen bën thïn, rin ba arem aköl kënë thöl.

28 Wä, cöl rienku alec!”

Go röl jam nhial ku lueel, “Aca cöl alec ku aba bën cöl alec.”

29 Go kɔc ke kääc thïn tēen röl piŋ ku luelkë, “Deŋ acï mär.” Go kɔc kɔk lueel, “Atuny Nhialic acï jam tènë ye.”

30 Tēenë, go Jethu lëk ke, “Ee cie tènë ya yen jicem röl kënë, ee rienkun.

31 Ëmën, ë tē bï luk teem tènë kɔc tō pinynhom, ku bēny jakrec abï cuop wei.

32 Tē cï ya jat nhial, ke yen abï kɔc ëbën miëet tènë ya.”

33 Ku wën lueel yen kënë, ke wïc bï nyuath yen tē bï yen thou thïn.

34 Go akut bëer tènë ye, “Wët cï göt athör yic ë yok lëk lön bï Raan cï lɔc ku dɔc, pïr akölrïëc ëbën. Na yïin lëu kädë ba lueel lön bï Manh Raan jat nhial? Ku yeŋa yen Manh Raan?”

35 Go Jethu bëer, “Aŋoot tēthin nyoat bï ruel rëer kamkun. Lakkë tuen dhöldun yic ëmën tōu ruel

tënë we bi muöth we cii döt, rin raan cath muöth yic akuc tē ler yen thīn.

³⁶ Gamkē ruēl emēn ḡoot yen kek we, rin bāk aa kōc ruēl.” Tēwēn cī Jethu wēlkā lueel ke la ayeer ku thiēen rot tēnē ke.

Kōc Itharel aa kuc ē gam

³⁷ Na cōk amēn cī yen luoi rilkā ebēn looi kenhūim guōp, ke keek aa kēc wētde gam,

³⁸ bi wēt cī Ithaya, raan kāk Nhialic tīḡ kaḡ lueel thēer yenhom tiēeḡ, wētdeḡ wāār lueel ēlā,
 “Bēny, yeḡa cī wēt cuk lēk kōc gam?
 Yeḡa cī Bēny nyuōth riēl?”

³⁹ Ku rin ē kēnē acīn tē bi kek gam, rin wēt kēnē aya, acī Ithaya lueel ēlā,

⁴⁰ “Aacī Nhialic dhōny nyīn, ku mēr kepuōth. Bīk kāḡ cī tīḡ kenyīn, ku cīk wēt det kepuōth. Bīk rōt wēl ḡen ku ba keek kony.”

⁴¹ Ithaya acī kēnē lueel rin cī yen lēc Jethu tīḡ ku jīēem riēnke.

⁴² Ku emēn aya, ke bāny kōc Itharel aake cī wēt Jethu gam, ku akēckē lueel kōc nhūim, rin riōc kek kōc akut Parathī bīk ke cī cop wei tēn amat.

⁴³ Aake lēc kōc nhiaar tēnē lēc Nhialic.

Jethu abī luk looi tēnē kōc ebēn

⁴⁴ Go Jethu lueel rōldīt kōc nhūim, “Raan gam wēt diē acie wēt diē rot yen ye gam, ee wēt raan toc ḡa gam aya.

⁴⁵ Ku raan tīḡ ḡa, ka tīḡ raan cā tooc aya.

⁴⁶ ḡen acī bēn cimēn ruēl pinynhom, bi raan ebēn gam wēt diē cī ben rēer muöth yic.

⁴⁷ Raan piŋ wětđië ku cii lõk looi, ke ɣen acin wět ba tēm ye, rin kęc ɣen bën ba kəc pinynhom bën luk, ɣen aci bën ba ke bën piir.

⁴⁸ Raan kuc e ɣa ku cii wětđië gam, raan bi ye tēm awuoc abi tã thĩn, ku wětđiën ca lək kəc abi ye luk aköl ciëen.

⁴⁹ Ku e këya, rin kęc ɣen jam wět piändië rot, ku e Wä Aciëŋ toc ɣa, yen aci ɣa thõn kë ba dhiel lueel ku jaam e yic.

⁵⁰ Ku anjɛc lɔn ye wětde pĩr akölrĩëc ebën bëi. Käk ya lueel aa käk ci Wä nyuõth ɣa ba ke lueel.”

13

Jethu aci kacken ye buõth lõk cök

¹ Ee ye aköl Yan Ayum cĩn yic luou nhom tueŋ. Go Jethu ŋic lɔn ci aköl jiël yen pinynhom tēn jāl bën, ku bi la tēnē Wun. Yeen aci kacken rëer pinynhom nhiaar alanden, ku nhĩer ke ɣet tē bi wět thök.

² Jethu ku kacken ye buõth aake ci nyuc bik mieth thēi cam. Ku jɔŋrac eci wět tãau Judath, wēn Thaimon Ithkariõt puõu, bi Jethu gaany.

³ Go Jethu ŋic lɔn ci Wun riel ebën tãau yecin, ku e ŋic lɔn ci yen bën tēnē Nhialic, ku e ben dhuk tēnē ye.

⁴ Go rot cuot wei tēwēn mĩth kek thĩn ku dək alanh kōu, ku ruk alanh wuõny ye aŋum.

⁵ Ku jəl piũ puõk aduõk yic ku lõk kacken ye buõth cök, ku wuuny ke alanh wuõny wēn ci ruõk ye aŋum.

⁶ Ku jəl bën tēnē Thaimon Pĩter, go Pĩter lək ye, “Ye yĩn bā lõk cök, Bēny?”

⁷ Go Jethu bëer tēnē ye, “Ke luõi acii ye deet yic emēn, ku aba lõk deet yic.”

⁸ Go Piter lueel, “Yin acii ya bi kan lək cök acin.” Go Jethu bæer, “Na cä yi lək cök, ke yin acin tē bi yin ben a raandiē.”

⁹ Go Thaimon Piter lueel, “Bëny, na ye këya ke yi duk ya lək cök ë rot, lək yacin ku yanhom aya.”

¹⁰ Go Jethu lueel, “Raan ci laak acin guöp acuol, ku abi yecök lək rot. Wek aa yer ëben, ke raan tök kamkun yen acii yer.”

¹¹ Jethu ë ñic raan bi ye gaany, yen ë lueel yen ye ëlä, “Wek aa yer wedhie, ke raan tök yen acii yer.”

¹² Nawën ci Jethu ke lək cök, ke ben alanhde ruök ku nyuuc tēden wën rëer yen thïn, ku thiëc ke, “Cäk käk ca looi tēnē we ëmën deet yiic?”

¹³ Wek aa ya cöl raan piöoc ku Bëny, ku yeen apath bäk looi këya, rin ë ya.

¹⁴ Yen ë Bëny ku Raan piöoc tēnē we, ku ñot we laak cök. Ke week aya, wek aabi wecök lək kamkun, ñek kek ñek.

¹⁵ Wët path aca nyuöth we, bäk looi cimen ci yen ye looi tēnē we.

¹⁶ Wët yic alək we, acin alony dit tēnē banyde, ku acin atuny dit tēnē raan toc ye.

¹⁷ Emën ñic wek wët yic kënë, tē looi wek ye, ke miët puöu dit abäk yök thïn.

¹⁸ “Yen acii jam ë rienkun ëben, yen anic kəc ca kuëny bei. Ku wët ci göt athör thëer wël Nhialic yic ëlä, ‘Raan mith yok aduäj tök yic acie nhom wël ya,’ adhil yenhom tiëñj.

¹⁹ Wek aa lək wët kënë ëmën ke këc rot guo looi, rin aköl bi yen rot looi ka bäk jäl gam lön, ‘Ye Yen Yeen.’

20 Wēt yic alëk we, raan lor raan ca tooc, acä lor aya, ku raan lor γεν ka lor raan toc γεν aya.”

Kë cïn Judath pušu acï lueel

(Mt 26:20-25; Mk 14:17-21; Lk 22:21-23)

21 Nawën cï Jethu wëlkä lueel, ke ηεεr yic ku lueel, “Wēt yic alëk we, raan tök kamkun abi γa gaany.”

22 Go kɔc ye buɔθh kenyïn liäāth kamken ke cï nhïim la dïl apëi wēt ye lueel.

23 Ku raan tön̄ nhiεεr Jethu kam kɔc ye buɔθh, ëcï nyuc Jethu lööm,

24 go Pïter nieu nyïn ku lueel, “Thiëc, ye raan nεn yen jïεem yen rienke.”

25 Go atuny kënë rot cuöt Jethu ku thiëc, “Bëny, ye yen ë ηa?”

26 Go Jethu bëër, “Ee raan bi γεν ayup luöt kada yic ku yiëk ye.” Ku lööm ayum ku lut kada yic ku yik Judath, wën Thaimon Ithkariöt.

27 Tëwën lööm Judath ayup, ke jəηrac go la yeguöp. Go Jethu lëk ye, “Kë wïc ba looi, lɔc looi.”

28 Ku acïn raan kam kɔc ke müth kek ye cï wēt deet yic, ye rin n̄ö yen jïεem Jethu këya tënë ye.

29 Ku rin yen Judath yen wëëuken muk, ke cï kɔcken kök tak lɔn cï Jethu ye lëk ye bi la γɔc kä wickë rin yai, tädë ke cï lueel bi kɔc ηön̄ muɔɔc.

30 Ku kaam wën lööm Judath ayup, ke la aγeer. Ku ë ye waköu.

Lön̄ Yam

³¹ Wën cī Judath jāl, ke lueel Jethu, “Ēmën læc Manh Raan aci nyuõth kəc, ku læc Nhialic aci nyuõth kəc ë ye.

³² Ku tē cī læc Nhialic nyuõth kəc ë ye, ke Nhialic abī læc Manh Raan nyuõth yeguõp, ku abī lac looi nyin yic.

³³ Miëthkië, yæn acīi bī rëër kek we apēi. Wek abä wic, ku alëk we ëmën yen wët ca lëk kəc Itharel, ‘Acin tē bī wek la tē ler yæn thīn.’

³⁴ Löŋ yam ayiëk we, nhiarkë röt kamkun, cimën cī yæn we nhiaar, këya, ke wek aa dhil röt nhiaar kamkun.

³⁵ Na nhiarkë röt kamkun ka bī ŋic kəc ëbën lön ye wek kockiën ya buõth.”

Pïter ajēi Jethu

(Mt 26:31-35; Mk 14:27-31; Lk 22:31-34)

³⁶ Go Thaimon Pïter thiëëc, “Na yīin lördë Bëny?” Go Jethu bëër, “Tē ler yæn thīn acin tē buõth yīn yacök ëmën, ku yīn abä buõth aköldä.”

³⁷ Go Pïter thiëëc, “Bëny, yeŋö cīi yæn ye lëu ba yī buõth ëmën? Atöu yapuõu ba thou ë rienku.”

³⁸ Go Jethu bëër, “Lëu ba thou alanden ë rienkië? Wët yic alëk yī. Tē ŋot këc thön ajith kiu, aba lueel arak diäk lön kuc yīn ya.”

14

Jethu ee dhël la tënë Wun

¹ Go Jethu lëk ke, “Duökkë diëer ku rëërkë we rac puõth. Gamkë Nhialic ku gamkë ya aya.

² Pan Wä ala yic yööt juëc, ku yæn ala ba piny la guiir tënë we. Na cie yic wët kënë, ŋuõt akëc lëk we.

³ Ku tē cī ɣen la ba piny la guir tēnē we, ke ɣen abī dhuk ba we mat tēdiē rin bāk rēer tē tōu ɣen thīn.

⁴ Ku dhēl bī wek yet tē le ɣen thīn anjēckē.”

⁵ Go Thomath lēk ye, “Bēny, ɣok aa kuc tē le yīn thīn, ku buk dhēl bī ɣok yet tē tō yīn thīn ɳic kēdē?”

⁶ Go Jethu bēer tēnē ye, “ɣen ee dhēl ku yic ku pīr, acīn raan la tēnē Wā tē cīi yen rīenkiē.”

⁷ Ku lēk ke, “Ēmēn cī wek ɣa ɳic, ke wek aabī Wā ɳic aya, ku ēmēn yet tuen, anjēckē ku acāk tīŋ.”

⁸ Go Pilipo lueel, “Bēny, nyuōth ɣo Wuur, yen ee kē wīcku yetōk.”

⁹ Go Jethu bēer, “ɣen acī cen apei kek we, ku yīn anot yī kēc ɣa ɳic, Pilipo? Raan cā tīŋ, acī Wā tīŋ aya. Yenō ē yīn ye lueel, ‘Nyuōth ɣo Wuur?’

¹⁰ Kēc gam yīn Pilipo, lōn rēer ɣen Wā yic ku Wā ɣayic?” Ku jōl Jethu lēk kōcken ye buōth, “Wēl ca lēk we aacie wēl bō bei tēnē ɣa. Wā rēer ɣayic, yen ē luōide looi.

¹¹ Gamkē wētdiē lōn rēer ɣen Wā yic ku lōn tō Wā ɣayic. Na liu gam ke gamkē rin luōikiē.

¹² Wēt yic alēk we, raan gam wētdiē abī luōi ya looi a looi, ku tēdēt abī luōidīt tēnē luōidiē a looi, rin ler ɣen tēnē Wā.

¹³ Ku kēriēec ēbēn bāk thiēec ē rīenkiē aba looi, rin bī lēc Wun nyuōth rin Wēnde.

¹⁴ Tē thiēec wek kēdāŋ ē rīenkiē, ka ba looi.

Athōn bī Wēi Nhialic bēn

¹⁵ “Na nhiarkē ɣa, ke we piŋ lōŋkiē.

¹⁶ ɣen abī Wā thiēec ku abī we yiēk raan dēt kōc kony, ku ye Wēi ē yic bī rēer kek we akōlriēec ēbēn.

17 Acin tē bi kɔc pinynhom ye gam, rin acik lēu bik tɪŋ ku cik lēu bik ŋic. Ku yeen aŋiɛckē rin yen adōŋ kek we ku aciēŋ kek we.

18 “Wek aacā bi pušl wepɛc, ɣen abī dhuk tēnē we.

19 Aŋoot tēthin-nyoot ku kɔc pinynhom aaciī ɣa bi bɛn tɪŋ ku wek aabā tɪŋ, ku rin pīir ɣen, ke wek aabi pīr aya.

20 Tē ler aköltui bēn ka bāk ŋic lɔn tō ɣen Wā yic ku lɔn rēer ɣen weyiic.

21 “Raan gam lōŋkiē ku looi ke, yen ē raan nhiaar ɣa. Ku raan nhiaar ɣa abī Wā nhiaar, ku yeen aba nhiaar aya, ku ɣen abī rot nyuōth ye.”

22 Go Judath lueel, ku yeen acie Judath Ithkariöt, “Bēny, bi rot lēu kēdē ba rot nyuōth ɣo ku cīi rot nyuth kɔc pinynhom?”

23 Go Jethu bēer tēnē ye, “Raan nhiaar ɣa, ka piŋ wētdiē ku yeen abī Wā nhiaar, ku ɣok aabi bēn tēnē ye ɣok Wā buk pīr kek ye.

24 Raan cīi ɣa nhiaar acie wētdiē ye piŋ. Wēt cāk piŋ tēnē ɣa acie wētdiē, ee wēt bō tēnē Wā raan toc ɣa.

25 “Wēlkā aaca lēk we emēn ŋoot ɣen kek we.

26 Ku raan kɔc kony, Wēi Nhialic bi Wā tuōc ē rienkiē yen abī we piōc kēriēc ebēn ca lēk we.

27 “Dōr aya nyāāŋ piny ke we, ku dōrdiē guōp ayiēk we. Acā ye gām we cimēn ye kɔc piny ye yiēk kɔc. Duōkkē yiic ŋeɛr ku duōkkē riōc.

28 Acāk piŋ ke luɛl tēnē we ēlā, ‘ɣen ajiēl ku ɣen abī la dhuk tēnē we.’ Na nhiarkē ɣa ke wek aabi puōth miɛt rin ler ɣen tēnē Wā, rin adiit tēnē ɣa.

29 Kēnē aca lēk we emēn ke ŋot kēc rot guo looi, na le rot looi ke bāk gam.

³⁰ Acä lëu ba jam apai kek we ëmën, rin jəŋ pinyhom abö. Ku yeen acin riel tənë ya.

³¹ Ku adhil kəc pinyhom ɲic lən nhiεεr γen Wä, yen ë rin ye γen kəriëëc ëbën ye thön ya looi.

“Bäk, jiëlku tən.

15

Jethu yen abiënyic

¹ “γen abiënyic ku Wä ë raan dom,

² yen ee kuart kër cie luək tō γakəu tεem wei, ku teem kuart kër luək nhom, rin bī nyäc bī ɲic luək apai.

³ Wek aaci jäl piath rin piöoc ca yiëk we.

⁴ Rëërkë akut yic kek ya, ku γen abī rëër akut yic kek we. Kër acie luək ë rot, alëu bī looi tē rëër yen abiëc yic. Këya, acäk lëu bäk luək tē cii wek rëër γayic.

⁵ “γen abiëc ku wek aa kër. Raan rëër γayic ku γen yeyic abī luək apai, rin week acin kē lëukë bäk looi tē liu γen tənë we.

⁶ Raan cie rëër γayic ka ya cuat wei cımën kër tim ku bī riel, ku kuart kërkä aabī kuööt yiic ku cuet ke mεεc tē bī kek döp thın.

⁷ Na rëërkë γayic, ku rëër wëlkië wepuöth ke kəriëëc ëbën bäk thiëëc ku wiëckë, ka bäk yök.

⁸ Lεc Wä aye nyuöoth tē lok wek apai, ku këya, ke wek aabī ya kackiën ya buöth.

⁹ Wek aa nhiaar cımën nhiεεr Wä γen, rëërkë nhiërdië yic.

¹⁰ Na thekkë lööŋkië ke wek aabī rëër nhiërdië yic cımën cī γen lööŋ Wä buöth yiic, ku rëër nhiërde yic.

11 “Kënë aca læk we, bï miæt puõu tã tënë ya tãu wepuõth aya, ku bï miæt piãndu thããp ë dît.

12 Ku lõndië akìn, nhiarkë rõt cimën cï yen we nhiaar.

13 Nhiërdit tet lëu raan bï yiëk mãthke, ee gem wëike ë rienken.

14 Ku wek aa mãthkië tã looi wek kãk ca læk we.

15 Wek aacã bï bën cõal aloony, rin alony akuc kãk ye wun baai looi. Ku wek aaya cõal mãthkië, rin cï yen këriëec ëbën ca piŋ tënë Wã nyuõth we.

16 Aacie wek cã lóc, ee yen acï we lóc, ku wek aaca tooc bãk la bãk la luui apëi, luoi bï dõŋ athëer. Ku Wã abï këriëec ëbën cãk thiëec ë rienkië yiëk we,

17 kë thõn we akìn, nhiarkë rõt kamkun.

Mãn kãc pinynhom

18 “Na man kãc pinynhom we, ke dhielkë tak lõn cï kek ya kaŋ maan.

19 Na we kãc pinynhom, ke kãc pinynhom aabi we nhiaar rin ye wek kacken, ku wën cï yen we kuëny bei pinynhom, ke wek aacie kãc pinynhom, ku rin ë wët kënë, kãc pinynhom aa man we.

20 Muõkkë wët ca læk we nhom, ‘Acïn alony dît tënë bãnyde.’ Na jõrkë ya, ke keek aabi we jõör aya, na piŋkë wëtdië, ke keek aabi wëtdun piŋ aya.

21 Ku keek aabi kãkkã looi ëbën tënë we rin ye wek kackië, rin kuc kek raan cã tooc.

22 Na ya këc bën ku cã jam tënë we, ŋuõt aa këc gup la adumuõõm, ku cit ëmën këlã, acïn tã bï ke bën puõl rin adumuõõmken.

23 Raan man ya, ee Wã maan.

24 Na ɣa kɛc luɔikä kaŋ looi kamken, käk cɪn raan cɪ ke kaŋ looi, ŋuɔt aa cɪn gup adumuɔɔm, cɪt ɛmɛn kɛlä, aaci käk ca looi tɪŋ, ku keek aa ŋot ke man ɣa ku Wä aya.

25 Ku kɛnɛ adhɪl rot looi kɛya bɪ wɛt cɪ gɔt lɔŋden yic rot tɪɛɛŋ, ‘Keek aa man ɣa ɛ path ke cɪn wɛt yic.’

26 “Raan kuɔɔny abɪ bɛn, Wɛi Nhialic abɪ yiny Nhialic nyooth, ku yeen abɔ tɛnɛ Wä. Yeen aba tuɔc we tɛnɛ Wä, ku yeen abɪ jam ɛ rɪɛnkiɛ.

27 Ku week aya wek aabi jam ɛ rɪɛnkiɛ rin cɪ wek rɛɛr ke ɣa thɛɛr.

16

1 “Kɛnɛ aca lɛk we bäk gamdun cɪi päl.

2 Wek aabi cuɔp wei tɛn amat. Ku kaam abɪ bɛn, tɛ bɪ kuat raan nāk we ye tak lɔn na looi kɛnɛ, ke yeen aluui Nhialic.

3 Keek aabi kākä looi tɛnɛ we, rin kuc kek Wä ku kuckɛ ɣa.

4 Kākä aaca lɛk we, rin akɔl bɪ kek kākä looi, ka jälkɛ tak lɔn cɪ ɣɛn ye kaŋ lɛk we.

Luɔi Wɛi Nhialic

“Wɛlkä aa kɛc lɛk we wäär tuɛŋ rin rɛɛr ɣɛn kek we.

5 Ku ɛmɛn ɣɛn ala tɛnɛ raan cä tooc, ku aŋot cɪn raan kamkun ɣa thiɛc, ‘Na yɪin lɔr dɛ?’

6 Ku ɛmɛn cɪ ɣɛn ye lɛk we, wek aaci puɔth jɪɛth.

7 Wɛt yic alɛk we, aŋuɛɛn tɛnɛ we lɔn jiɛl ɣɛn, rin na cä jiɛl ke raan kɔc kony aaci bɪ bɛn tɛnɛ we. Ku na jäl ke yɛn aba la tuɔc we.

⁸ Ku na bii, ka bi nyuöth kɔc pinyhom lɔn rɛɛc kek rin wët adumušom, ku rin wët ciɛɛŋ path ku wët luŋ Nhialic.

⁹ Keek aa rɛc rin wët adumušom, rin kɛc kek ɣa gam,

¹⁰ rin wët ciɛɛŋ path ci ladië tənë Wä nyuöth, ku kɛ cii wek ɣɛn bi bɛn tiŋ.

¹¹ Ku keek aa rɛc rin luk, rin ci bɛny pinyhom tɛn luök wei.

¹² “ɣɛn ala käjuéc kök ba lɛk we, ku emɛn aril yic bäk ke muk wenhüm.

¹³ Ku na bɔ Wëi Nhialic yen ë yic, ka bi we nyuöth wël yith ëbɛn. Yeen acii bi jam wëlke ë rot, ku käk ye piŋ aabi lɛk we.

¹⁴ Yeen aba leec, rin bi yen këdiɛn ba lueel lööm ku nyuth we.

¹⁵ Käk Wä ëbɛn aa käkkië, ku ë yen aci ɣɛn ye lueel lɔn bi Wëi käk ba yiëk ye lööm, ku jol ke lɛk we.

Rëc puöu ku miɛt puöu

¹⁶ “Aŋoot kaam thin nyöot, ku wek aacii ɣa bi tiŋ, ku na ben a kaam thin nyöot ke we aabi ɣɛn bɛn tiŋ.”

¹⁷ Go kɔc kök kam kɔcken ye buöth lueel, “Kënë wëtde yic yenö? Aye lɛk ɣo, kaam thin-nyöot ke week aacii ɣa bi bɛn tiŋ, ku ben a kaam thin-nyöot ku wek aabi ɣa tiŋ? Ku lueel aya, ‘Ee rin ler ɣɛn tənë Wä.’ ”

¹⁸ Gokë thiëc, “Kam thin-nyöot këne wëtde yic ako? Kë wic bi lueel akucku!”

¹⁹ Go Jethu ŋic lɔn wic kek ye bik thiëc, ku lɛk ke, “Aca lueel, ‘Kam thin nyöot ke wek aacii ɣa bi tiŋ, ku na ben a kaam dɛt ke wek aabi ɣa tiŋ.’ Ye wët këne yen yakë thiëc kamkun?”

20 Wēt yic alēk we, wek aabī dhiau ku dhušörkē apēi, ku kōc pinynhom aabī pušth miēt, ku wek aabī pušth rēēc, ku rēēc piändun abī wel tēnē we bī ya miēt pušu.

21 Na thišk tik kek dhiēth ka rac pušu rin cī aköl reem ye yēēt, ku na cī meth jāl dhiēēth ka arēem wēn aciī ben tak rin cī yen pušu miēt, rin cī yen meth dhiēēth pinynhom.

22 Ku acit kēnē tēnē we aya, wek aa rēc pušth emēn, ku wek aabā ben tīŋ, ku wek aabī kuēth miēt ē pušu, kuat miēt pušu cīn raan bī ye ben nyaai tēnē we.

23 “Na la aköl kēnē bēn ke wek aaciī ya bī ben thiēēc kēdār. Wēt yic alēk we, kēriēēc ebēn bāk thiēēc ē rienkiē abī Wā yiēk we.

24 Yet yaköl acin kē cāk thiēēc ē rienkiē, thiēckē ku abāk yōk, bī miēt pušu dīt tēnē we.

25 “Kākkā aake ya lēk we waal, ku tē cīi yēn bī ben jam waal aci thišk, ku yēn abī ya jam tēnē we wēl la gēi rin Wā.

26 Tē le aköl kēnē bēn, ke wek aabī Wā thiēēc ē rienkiē. Ku acā bī lēk we lōn bī yēn ya rōök ē rienkun tēnē Wā,

27 rin Wā anhiar we rin nhiēer wek ya, ku rin cī wek ye gam lōn yēn a ya bō tēnē Nhialic.

28 Yēn abō tēnē Wā ba bēn pinynhom, ku pinynhom aba pušl ku dhušk tēnē Wā.”

29 Go kōcken ye buōth lēk ye, “Tīŋ, yīn ajam gēi emēn ke yī cīi ben jam waal.

30 Acuk ŋic emēn lōn ŋic yīn kēriēēc ebēn, ku yīn aaciī tit bī yī thiēēc, rin wēt kēnē acuk ŋic lōn bīi yīn tēnē Nhialic.”

31 Go Jethu bēer tēnē ke, “Cāk jāl gam emēn?

³² Piɛŋkë tēdāŋ abī bēn, ku aci thiök ayic, tē bī wek wɛɛr bī ŋɛk ala panden, ku wek aabä nyääŋ piny yatök. Ku acie ɣɛn yatök rot, rin Wä arēɛr kek ɣa.

³³ Wek aaca lëk kënë rin bäk aa tök kek ɣɛn, bäk döör yök. Kɔc pinynhom aabi we jöör, ku dɛɛtkë wepuoŋth ɣɛn aci käreɛc pinynhom lëu!”

17

Jethu aröök rin kacken ye buoath

¹ Nawēn cī Jethu wēlkä thöl luɛl, ke ŋɛɛr yenyin nhial ku lueel, “Wä, aköl aci yēɛt. Yiök lɛc Wēndu ku bī Wēndu yī yiök lɛc.

² Rin yīn aci bääny yiök ye kɔc nhīim ēbēn, bī pīr akölriēɛc ca gām ye yiök kɔc ēbēn.

³ Ku pīr akölriēɛc akīn, bī kɔc yī ŋic lɔn yīn ē Nhialic la cök, ku ŋickë Jethu raan cī lɔc ku dɔc wäär ca tuöc pinynhom.

⁴ ɣɛn aci lɛcdu nyuoath pinynhom, ku luɔi ca yiök ɣa ba looi aca thääp.

⁵ Wä, gām ɣa lɛcdu yīnhom tēn ēmēn, lɛc wäär rēɛr kamkua ɣok yī, wäthɛɛr ke piny kēc cak.

⁶ “Yīn aca nyuoath tēnë kɔc ca yiök ɣa pinynhom. Keek aake ye kacku, ku ē yīn aci ke gām ɣa, ku keek aaci wētdu gam.

⁷ Ke ēmēn aŋickë lɔn kēriēɛc ēbēn ca yiök ɣa abö tēnë yī.

⁸ Wä ɣɛn aci wēt ca lëk ɣa lëk ke, gokë gam, ku aŋickë ayic yen lɔn bīi ɣɛn tēnë yī, ku acik gam lɔn cī yīn ɣa tooc.

⁹ “ɣɛn ē röök ē rienken. ɣɛn acie röök rin kɔc tō pinynhom, ee rin kɔc ca yiök ɣa rin ye kek kacku.

10 Käkkië ebën aa käcku, ku læcdië aye nyuəəth keyiic.

11 Ku emën yen abö tənë yī, yen aciī ben a raan rëer pinynhom, ku keek aatö pinynhom. Wä dhēŋ, tit ke riel ë rienku, rin wäär ca yiëk ya, bik aa tök cīmēn yok yo yī.

12 Wäär rëer yen ke ke, aaca muk riel ë rienku, keek aaca ke tiit ku acin tōŋ cīi määär kamken. Arëk ke raan wäär yen bi dhiel määär ë rot, rin bi wët ci gōt athör thëer wël Nhialic yenhom tiēŋ.

13 Ku emën yen abö tənë yī, ku käckä aa ya lueel ya ŋoot pinynhom bi miēt piändië rëer kepuəəth ke dit alanden.

14 Yen aci wët lëk ke, go kəc pinynhom ke maan, rin cīi kek ye kəc pinynhom tēn. Cīmēn cīi yen ye raan pinynhom tēn aya.

15 Yin acä bi thiëc ba ke nyaai pinynhom, ku yin aya thiëc ba ke tiit jəŋrac.

16 Keek aacie kəc piiny tēn cīmēn cīi yen raan piny tēn.

17 Mac ke wët yic, rin wëtdu ë yic.

18 Keek aca ke tuəc pinynhom cīmēn cī yin ya tuöc pinynhom.

19 Yen ë rot mac ë rienku, ku bik röt mac aya wët yic.

20 “Yen aciī röök rienken röt, yen aröök aya rin kəc bi gam rin piöcden.

21 Yen aröök rin bi kek aa tök. Wä, cəl ke aaye tök yoyiic cīmēn tō yin kek ya ku yen kek yī. Cəl ke aaye tök rin bi kəc pinynhom ye gam lən cī yin ya tooc.

22 Yen aci læc ca yiëk ya, aca yiëk ke bik aa tök cīmēn ye yok tök.

²³ Үен арээр keyiic cимән рээр yин җайиc бiк aa тoк eбeн, бi кoс pinynhom җиc лoн cи yин җa тоoc, ку лoн нhiер yин ke cимән нhiер yин җa.

²⁴ “Wä, keek aaca yiëk җa, ku awiëc бiк рээр тe рээр җен thин, бiк лecdië тiҗ, лeс ca yiëk җa, rin нhiер yин җa wäär këc piny guo cak.

²⁵ Wä raan la cök, koc pinynhom aa kuc yi, ku yin anҗec, ku kockä anickë лoн cи yин җa тоoc.

²⁶ Yin aca nyuoth тeнe ke, ku aba җot луoи кeяa, rin бi нhiерду тeнe җa тo keyiic, ku ba тoу keyiic aya.”

18

Jethu aci dam

(Mt 26:47-56; Mk 14:43-50; Lk 22:47-53)

¹ Tëwën cи Jethu rөөk кeяa, ke jiël kek kocken ye buoath ku teem wär cол Kidron. Ku gör e тo thин тeәнe, go Jethu la thин kek kocken ye buoath.

² Ku Judath raan gony ye e җиc тe cи yen la thин, rin cи Jethu kaҗ röm thин kek kocken ye buoath arak juëc.

³ Go Judath la gör yic kek akut apuruuk, ku koc kock luanҗ Nhialic tiit, cи koc käk Nhialic ku koc akut Parathituoс thин. Keek aake muk тoҗ ku mermer,

⁴ ku Jethu e җиc кeriëc eбeн бi rot looi тeнe ye, go ke lor нhiim ku thiëc ke, “Yeҗa wiëckë?”

⁵ Gokë бeэр, “Ee Jethu raan Nadharet.” Go lueel, “Ee җен.” Ku Judath, raan gony ye e тo thин ke ke.

⁶ Kaam wën lëk Jethu ye ke, “Ee җен,” Ke riҗ ciëen keköth ku wiikkë piny.

⁷ Go Jethu ke бeн thiëc, “Yeҗa wiëckë?” Gokë lueel, “Ee Jethu raan Nadharet.”

⁸ Go Jethu lueel, “Aca lëk we wënthæer lön ye yen ya. Na wiëckë ya, ke we päl kockä bik jäl.”

⁹ Yeen aci jam kälä bi wët ci kañ lueel ëlä rot tiëñ tädë, “Wä, na cök a raan tökalin kam kəc ca yiëk ya, ka këc muör.”

¹⁰ Ku Thaimon Pïter ë muk pal. Go miëët bei ku tök alony raandit käk Nhialic ku teem yinyden cuëc wei. Ku alony ë cöl Malko.

¹¹ Go Jethu lëk Pïter, “Dhuök paldu jökgođe yic. Ye tak lön ci yen aræem ci Wä yiëk ya bi guum.”

Jethu aci yäth Anath nhom

¹² Go akut apuruuk kek bányden ku kəc Itharel ke tit, Jethu döm ku derkë,

¹³ ku kəñkë yäth tənë Anath. Ku Anath ë ye wun tinj Kaipa, raandit käk Nhialic ye ruöñ kënë.

¹⁴ Ee Kaipa yen ëci ye kañ lëk kəc Itharel lön ñuëñ yen bi raan tök thou rin kəc.

Pïter ajei Jethu

(Mt 26:69-70; Mk 14:66-68; Lk 22:55-57)

¹⁵ Go Thaimon Pïter kek raan dët Jethu buoöth, ku raan Jethu buoöth kënë ë ñic raandit käk Nhialic guöp apëi, go la kal pan raandit käk Nhialic yic kek Jethu.

¹⁶ Ku döñ Pïter ayeer kal thok. Go atuny wën ñiëc kek raandit käk Nhialic dhuk ayeer, ku jiëem kek nyen tit kal thok, ku biï Pïter aləñthïn.

¹⁷ Go nyen tit kal thok Pïter thiëc, “Cii ye raan tök kam kəc mony kënë buoöth?” Go Pïter bëër, “Yei, yen acie raande.”

18 Ku wiir ë tö thïn, go aloony ku kɔc tit many cool took, ku kēēckē many wēn lööm bik yɔc. Go Pīter la ku kēēc ke ke bi yɔc aya.

Jethu aluk raandit kāk Nhialic nom

(Mt 26:59-66; Mk 14:55-64; Lk 22:66-71)

19 Go raandit kāk Nhialic Jethu thiēec rin wēt kɔcken ye buɔth, ku rin wēt piššcde.

20 Go Jethu bēer, “Yen ë cool jam akōlaköl tēnē raan ebēn kɔc nhiim, ku piššcdiē ebēn aya looi tēn amat ku luan Nhialic tē ye kɔc Itharel guēer thïn. Ku yen acin kē ca kan lueel ke muɔny.

21 Ku yenō thiēec yin ya? Thiēc kɔc cī wēlkiē pinj. Thiēc ke wēl ca lēk ke, rin aa njic wēl ca lueel.”

22 Tēwēn cī Jethu jam kēlā, go raan tōk kam kɔc tit ke kääc thïn buššk nyin ku lueel, “Cii rišc ba jam kēlā tēnē raandit kāk Nhialic?”

23 Go Jethu bēer tēnē ye, “Na ca kušc jam, ke lēk kɔc tē cī yen kušc jiem thïn. Ku na ye yic yen ca lueel, ke yenō men yin ya?”

24 Go Anath tuɔc tēnē Kaipa raandit kāk Nhialic, ke not der cin.

Pīter aci Jethu ben jai

(Mt 26:71-75; Mk 14:69-72; Lk 22:58-62)

25 Pīter ë not kääc tēwēn ke yɔc mac. Go kɔc kōk lueel tēnē ye, “Cii ye raan tōk kam abiōth ë mony kēnē?” Go Pīter jai ku lueel, “Yei, yen acie raande.”

26 Go muɔny tōk kam aloony raandit kāk Nhialic, ruääi kek raan wēn cī Pīter tōk yic wei, jam ku thiēec, “Kēc yī tij kek ye gör yic?”

27 Go Pīter ben jai, ku kiu thon ajith nyin yic.

Kɔc Itharel aaci Jethu gaany tēnē Pilato

(Mt 27:1-2, 11-14; Mk 15:1-5; Lk 23:1-5)

28 Gokë Jethu thel wei pan Kaipa ku yëthkë pan bënydīt Roma, Pilato. Ku piny ë ye nhiäknhiaäk dur yic. Go kəc Itharel cii la aləŋthin pan bënydīt, ku bik röt tiit ajuëc rin cī yai thiök, ku bik miëth Yan Ayum cīn yic luəu cam.

29 Go Pilato la ayeer tənë ke ku thiëc ke, “Ye awäc ɲö cäk yök ye mony kënë guöp?”

30 Gokë bëër, “Na cīn awuöc cī looi ɲuöt akëcku bëi tənë yī.”

31 Go Pilato lək ke, “Week gup lömkë ku luəikë luk kē cīt löŋ ciεɲ pandun.”

Go kəc Itharel bëër, “Akëc puəl tənë ɣo buk raan tēm thou.”

32 Kënë acī rot looi bi wët cī Jethu lueel rot tiεɲ tēde, wën lueel yen kuat thon bi yen thou.

33 Go Pilato dhuk kal yic ku cəl Jethu ku thiëc, “Ye yīn Bënyjaknhom kəc Itharel?”

34 Go Jethu bëër, “Wët kënë ye wëtdu aye kəc kək kek cī ye lək yī ë rienkië?”

35 Go Pilato bëër, “Ye tak lən ye ɣen raan Itharel? Aa kacku guöp kek kacken dīt kək Nhialic, kek aa bii yī tənë ɣa. Yenö ca looi?”

36 Go Jethu bëër, “Bäänydië acie bääny pinynhom. Na bäänydië ye kën pinynhom, ɲuöt kackië aaci thör bi ɣen cii tēu kəc Itharel cin. Acie këya, bäänydië acie kën pinynhom tən.”

37 Go Pilato ben thiëc, “Yiin, ye bënyjaknhom?” Go Jethu bëër, “Aye lueel lən ye ɣen bënyjaknhom. ɣen acī dhiëeth ku ɣen acī bën pinynhom rin wët töŋ kënë, ba jam wët yic. Ku kuat raan cī yic ɲic ë wët dië piŋ.”

³⁸ Go Pilato thiëc, “Ku yic ye kën nō?” Ku ben dhuk ayeer tēnē kɔc Itharel ku lēk ke, “Acīn awuɔc ca lēu ba yōk yeguɔp bī ye luɔk wei.

³⁹ Ku yeen ē wēt piāndun ba raan tōŋ cī mac lony rin Yan Ayum cīn yic luɔu. Wiëckē ba Bēnyŋaknhom kɔc Itharel luɔny we?”

⁴⁰ Gokē dhuɔk ye ke loi κίεευ, “Acie këya! Acie yen wicku. Barabath yen awicku.” Ku Barabath ē ye cuär kɔc rum.

19

Jethu acī tēm thou

(Mt 27:15-31; Mk 15:6-20; Lk 23:13-25)

¹ Go Pilato Jethu dām ku cɔl athat.

² Ku jol apuruuk kēr thii tim la kuɔth riic yiic ku ŋɛk kek yenhom, ku tēukē alanh mathiāŋ yekɔu,

³ ku bikkē tēnē ye ku luelkē, “Madho, Bēnyŋaknhom, Bēny kɔc Itharel,” ku maŋkē nyin.

⁴ Go Pilato bēn dhuk ayeer ku lēk kɔc wēn cī kenhīm kut, “Yeen aba thēl ayeer tēnē we tēnē, ku bāk tīŋ lɔn cīn yen tē bī yēn awuɔc yōk yeguɔp ba luɔk wei.”

⁵ Këya, go Jethu bēn ayeer ke ceŋ ŋakŋak cī looi kuɔth ku alanh mathiāŋ yekɔu. Ku luel Pilato tēnē ke, “Yen kīn, yen raan!”

⁶ Nawēn tīŋkē, ke kɔc kāk Nhialic ku kɔc tīt kiu ku luelkē, “Piāat tim cī rīiu kɔu.” Go Pilato lēk ke, “Damkē kek we bāk piāat tim cī rīiu kɔu, yēn akēc awuɔc yōk yeguɔp.”

⁷ Gokē wēt dhuk, “Yok aa la lōŋ ciēŋda ye luel lɔn dhil ye nōk, rin acī luel lɔn ye yen Wēn Nhialic.”

⁸ Nawēn piŋ Pilato wēt kēnē, ke riɔc apēi.

9 Ku dhuk kal yic ku thiëc Jethu, “Yiin bäär tēnen?” Go Jethu biet ku cii bēer thok acin.

10 Go Pilato lēk ye, “Cii wic ba jam kek ya? Tak yinhom lon nadē ke yen ala riel ba yi puōl, ku yen ala riel aya ba yi cōl apiēēt tim cī rīū kōu.”

11 Go Jethu bēer, “Yin ala riel tēnē ya rin cī Nhialic ye yiēk yi, ku ē yen ale raan cā tāau yicin guōp awuōc rac apēi.”

12 Nawēn piŋ Pilato wēlkā, ke wic apēi bi dhēl yōk bi yen Jethu puōl. Go kōc Itharel kiu tēnē ye ku luelkē, “Tē lony yin ye ka ye nyooth lon cii yin määth kek Bēnyaknhom. Kwat raan rot looi bi ya bēnyaknhom, ee raan ater Bēnydan ŋaknhom.”

13 Nawēn piŋ Pilato ē wēlkā, ke thel Jethu ayeer ku nyuuc thōny luk tō laar cōl, “Piny cī guir kuōr,” Ku ē cōl Gabata thoŋ kōc Itharel.

14 Ku akōl kēnē yen akōl guir kōc rōt rin Yan Ayum cīn yic luōu. Nawēn tēcīt akōl ciel yic, ke lēk Pilato kōc Itharel, “Bēnydun ŋaknhom akīn!”

15 Gokē kiu tēnē ye, “Nāk! Nāk! Piāāt tim cī rīū kōu!” Go Pilato ke thiëc, “Wiēckē ba Bēnydun ŋaknhom piāāt tim cī rīū kōu?”

Go kōc kāk Nhialic bēer, “Bānyda ē tōk, ee bēnyaknhom Roma!”

16 Go Pilato ke yiēk Jethu bik la piāāt tim cī rīū kōu.

Jethu aci piāāt tim cī rīū kōu

(Mt 27:32-44; Mk 15:21-32; Lk 23:26-43)

Gokē Jethu dōm.

17 Ku ler ayeer ke ket timden cī rīū, ke jiēl geeu bi la tē cōl Golgotha. (Ku wētde yic, gōn la guen-ŋen cīt apen nhom raan.)

18 Ku jalkē piäät tim cī rīiu kōu. Ku piëätkē kəc karou aya tiim cī rīiu kōöth, raan tōk ləŋ cuēc ku raan dēt ləŋ cam. Ku Jethu ciəl kamken.

19 Go Pilato awuōc gōt bī tāāu tim cī rīiu nhom. Ku kēn cī gōt akīn, “JETHU RAAN NADHARET, BĒNYŅAKNHOM ITHAREL.”

20 Ku kəc juēc aake cī kēnē kueen, rin tēn cī Jethu piäät tim cī rīiu kōu thīn, aciī mec ke γεu. Ku wēt ēcī gōt thoŋ kəc Itharel ku thoŋ kəc Roma ku thoŋ Gīrik.

21 Go kəcdīt kāk Nhialic Itharel lək Pilato, “Duk ye gōt, ‘Bēnyŋaknhom kəc Itharel,’ aŋuēēn ba gōt, ‘Acī mony kēnē lueel, γεn ē bēnyŋaknhom kəc Itharel.’ ”

22 Go Pilato bēēr, “Kē ca gōt arēēr ke ca gōt.”

23 Nawēn cī apuruuk Jethu piäät tim cī rīiu kōu, ke lōm alāthke ku tekkē keyiic ŋuan, aban tōk tēnē apurušk tōk. Ku lōmkē alanh kōu aya cī kəoc kēdiēt tōk, jəok yeyeth yet piny.

24 Ku luelkē kamken, “Dukku tem kōu, cuetku gek buk tiŋ bī lōōny tēnē ŋa.” Kēnē aci rot looi bī wēt cī gōt athōr thēer wēl Nhialic yic rot tiēŋ tēde, “Keek aaci alāthkiē tek kamken, ku cuetkē gek rin alanhdiēn kōu.”

Kēnē yen aci apuruuk looi ayic.

25 Ku tēthišk kek tim cī rīiu Jethu, diäär aake kääc thīn, man ku nyankēn ē man, Maria tiŋ Klopath ku Maria Magdalena.

26 Nawēn tiŋ Jethu man ku raan ye buōth nhiēer ke kääc aya ē tēēn, ke lək man, “Tik manhdu akīn.”

²⁷ Ku ben lëk raan ye buoath wën, “Moor akïn.” Ku yaköl guöp ke wïc raan ye buoath awën piny paande.

Jethu aci thou ayic

²⁸ Nawën ñic Jethu lön cï keriëec ëbën thääp, ke lueel bï wët cï gõt athör theer wël Nhialic yic rot tiεεη, “Υεν anëk rou.”

²⁹ Ku töny cï thiäη muön wac ë tō thïn, gokë alath luöt mōu yic, ku tēükë wai thok, ku γoakkë yethok.

³⁰ Nawën cï Jethu muön wac jooc ke lueel, “Wët aci thääp.” Ku gut yenhom piny ku thou.

Jethu aci gut puöu

³¹ Go kəc Itharel Pilato thiëec bï ke puöl bïk kəc cï piäät tiim cï rïiu köth dhoη kuöl, ku nyεikë guäpken tiim cï rïiu köth. Ku ë loikë këlä rin ye yen aköl niën Dhiëc, ku acik ye wïc bï guäpken rëer tiim cï rïiu köth aköl niën Dätem, rin yen aköl yandit apεi.

³² Go apuruuk la ku dhoηkë kuöl raan tök ku kuöl raan dët, ë kəc cï piäät tiim cï rïiu köth kek Jethu.

³³ Nawën bikkë tënë Jethu, ke tïjkë lön cï yen thou ku cïk ben dhoη kuöl.

³⁴ Go apuruöη tök Jethu gut puöu təη, go riem ku pïu kuër nyin yic.

³⁵ Ku raan cï kënë tïj aci lueel rin bï wek ye gam aya. Wët cï lueel ë yic, ku yeen aηic lön ye yen wët yic yen lueel.

³⁶ Kënë aci rot looi bï wët cï gõt athör theer wël Nhialic yic rot tiεεη, “Acïn yuömden bï dhoη.”

³⁷ Ku ben lueel tädēt athör yic älä, “Ku aabi daai raan yen cık gut.”

Jethu aci thişk

³⁸ Nawën ë kënë cök ciëen, ke Jothep raan gen Arimatheo bō tēnē Pilato ku thiëc bi guöp Jethu nyaai. (Jothep ë ye raan Jethu buoθh ci gam, ku aye moony rin riöc yen bāny Itharel.) Go Pilato lëk ye lən ci guöp puöl tēnē ye. Go Jothep la ku le nyaai.

³⁹ Go Nikodemo, raan wäär ci kaŋ la tēnē Jethu waköu, rot mät Jothep ku ë muk miök nır cöl mira ci liäap wäl dēt cöl aloe.

⁴⁰ Go röör wën karou guöp Jethu lööm ku derkë köu alath ke ci wäl nır tääu thın, rin kënë yen ë tē ye kəc Itharel guiër guöp raan ci thou bi jal thişk.

⁴¹ Ku tēwën ci Jethu nök thın gör ë tō thın, ku raŋ yam ë tō gör yic, ku ë cın raan ci kaŋ thişk thın.

⁴² Ku rin bi yen aköl yan kəc Itharel nhiäk, ku rin thişk raŋ aya, gokë guöp Jethu tōöu thın.

20

Raŋ aci yic lääu

¹ Riel yic aköl Nhialic ke piny ɲot la durdur, ke Maria Magdalena la raŋ nhom, go aləl tıŋ ke ci nyaai raŋ thok.

² Go riŋ tēnē Thaimon Pıter, ku tēnē raan dēt Jethu buoθh nhiëer Jethu, ku lëk ke, “Kəc aaci Bēny nyaai raŋ yic ku akucku tē ci kek ye tääu thın.”

³ Go Pıter ku raan Jethu buoθh dēt wën lööny dhöl, ku lekkë raŋ nhom.

⁴ Ku keek aake la ke kat kedhie, go raan Jethu buoath dēt wēn kat apēi tēnē Pīter, ku ye yen kəŋ yet raŋ nhom.

⁵ Go guŋ ku tīŋ alanh wäär cī Jethu der, ku akēc la aləŋthīn.

⁶ Go Thaimon Pīter guə bēn ku ler raŋ yic. Go aləth tīŋ ke rēēr piiny,

⁷ ku alanh cī Jethu kum nhom ēcī rēēr kek aləth kək, ēcī mat yic tēde rot.

⁸ Go raan Jethu buoath dēt wēn cī kaŋ yet raŋ nhom jəl la aləŋthīn, ku gēm.

⁹ (Ku keek aake ŋot ke kēc wēt athör thēer wēl Nhalic deet yic, athör ye lueel lən bī yen rot dhiel jət thou yic.)

¹⁰ Go kəc ye buoath jal dhuk bei.

Jethu aci rot nyuəth Maria Magdalena

¹¹ Kaam wēn Maria ē kāac ayeer tēthiääk kek raŋ ke dhiau. Ku tēwēn ŋot dhiεeu yen ke guəŋ ku luiit raŋ yic,

¹² Ku tīŋ atuuc nhial cī ruk aləth yer karou, ke rēēr tēwäär cī guəp Jethu tōöu thīn, tək tē la yenhom ku dēt tē la yecök.

¹³ Gokē thiēc, “Tik, ye rin ŋö dhiεeu yīn?” Go lueel, “Keek aaci Bänydiē nyaai, ku akuəc tē cī kek ye tāäu thīn.”

¹⁴ Kaam wēn lueel yen kēnē, ku jəl wel yenyin ke tīŋ Jethu ke kāac yelööm, ku akēc ŋic lən ē yen Jethu.

¹⁵ Go Jethu thiēc, “Tik, ye rin ŋö dhiεeu yīn? Yeŋa wīc?” Go tak lən ē yen raan lui dom yic, ku lək ye, “Bēny, na ye yīn cī ye nyaai, ke lək ya tē cī yīn ye tōöu thīn, ku yen abī la ba la lööm.”

16 Go Jethu læk ye, “Maria.” Go yenhom wël ye ku lueel thonj kəc Itharel, “Rabuni,” ku wëtde yic, “Raan piöoc.”

17 Go Jethu læk ye, “Duk ya gət rin yen not ya këc yet nhial tənë Wä. Ku yiin lör tənë wämäthkië ku læk ke, ‘Yen adhuk ciëen tənë ye, yen ë Wä, ku ye Wuurdun, Nhialicdië ku ye Nhialicdun.’ ”

18 Go Maria Magdalena jäl ku le læk kəc ye buoath lön cï yen Bëny tñj, ku læk ke wël cï Jethu læk ye.

Jethu aci rot nyuöth kacken ye buoath

19 Nayon thëei ya aköl Nhialic wën, ke kəc ye buoath aake cï röt mat yon cï riit thok, rin riöc kek bány Itharel. Go Jethu bën ku këc kamken ku lueel, “Bï döör rëer kek we.”

20 Wën cï yen jam kälä, ke nyuth ke yecin ku yelöm. Go kəc ye buoath puöth miët apëi wën tñj kek Bëny.

21 Ku ben Jethu læk ke, “Bï döör rëer kek we, cimën cï Wä ya tooc, ke wek aa ba tooc aya.”

22 Wën cï yen jam kälä, ke jöl wëei kenhïim ku lueel, “Lömke Wëi Nhialic.

23 Na pälkë adumuööm kəc piny, ka pël piny, na cäk ke pël piny, ka cïi pël piny.”

Jethu ku Thomath

24 Ku Thomath, cöl Acueek, raan tök kam kəc kathiäär ku rou ye buoath, ee liu thïn wën bïi Jethu.

25 Go abiöth kök læk ye, “Bányda acuk tñj.”

Go Thomath læk ke, “Na cie tëtöök wäär cï ye piäät kek tiënj yecin, ku tääu yacin ë tëtöökä yiic, ku tääu yacin yeyou aya, ka cä kənj gam.”

²⁶ Nawën nin kabët cök, ka abiöth aake cï röt ben mat yöt ku Thomath ë rëër thïn ke ke, ku yöt ecï riit thok. Go Jethu ben kööc kamken ku lueel, “Bï döör rëër kek we.”

²⁷ Ku jəl lëk Thomath, “Tääu yïcin tën, ku tïŋ cienkië ku jət yïkök ba yïcin tääu γayou. Päl kënë yïn kăŋ dhöl yiic, ku gam!”

²⁸ Go Thomath bëër, “Bänydië ku Nhialicdië.”

²⁹ Go Jethu lëk ye, “Ca gam rin cï yïn γa tïŋ? Ye këpuoθh bï yiëndë tënë kəc bï gam ke kəc γa tïŋ!”

Wët wïc athör kënë bï nyuöθh kəc

³⁰ Jethu acï kädit jăŋ göi looi kocken ye buoθh nhïim, ku keek aa kəc göt athör kënë yic.

³¹ Ku kăkkä aaci göt rin bäk gam lön ye Jethu Wën Nhialic cï ləc, ku bäk pïr yök ë rienke tē cï wek gam.

21

Jethu acï rot nyuöθh kəc ye buoθh kadhorou

¹ Nawën ë kăkkä cök ciëen ke Jethu ben rot nyuöθh kocken ye buoθh wăr Tiberia γou. Ku tē cï luöi ye akïn.

² Thaimon Pïter kek Thomath (cəl Acueek), ku Nathaniel (raan Kana pan Galilia), ku wëët Dhubedi, ku kəc kək karou Jethu buoθh, aake rëër tëtök ëbën.

³ Go Thaimon Pïter lëk kəc wën, “Υεν ala μεi.”

Gokë lëk ye, “Υok aabi cath kek yï.” Gokë la ku lek riäi yic, ku acïn kë cik dəm ë wëër kënë yic ëbën.

⁴ Tëwën büi akəl nyin, ke Jethu ë kääc wăr γou, ku akəc kocken ye buoθh ŋic lön ë yen Jethu.

⁵ Go lëk ke, “Riënythii, cïn kē cäk döm?” Goke bëër, “Acïn kädäj.”

⁶ Go lëk ke, “Cuatkë buoi lon cuëny riäi, ku käj aa bäk döm thïn.” Gokë buoi cuat ku göök ke bïk miit rin juëc rec apëi.

⁷ Go raan Jethu buoath nhieer Jethu lëk Pïter, “Kën ë Bëny.” Nawën piñ Thaimon Pïter lon ye yen Bëny, ke ruk alanhde yekou (rin ci yen aläthke däk bei ëbën) ku thuëet wïir.

⁸ Go abiöth kök lök bën ke cath riäi, ke thel buoi ke ci thiäj rec. Ku keek aake cïi mec apëi kek agör, aake cit akääh bian tök.

⁹ Nawën keeckë piny ke tïj many ë miim ke dëp ku rec ke ci tääu mæec kek ayup.

¹⁰ Go Jethu lëk ke, “Bëëikë rec abëk rec awën cäk döm.”

¹¹ Go Thaimon Pïter la riäi yic ku miit buoi wär thok ke ci thiäj rec dït, ku rec ëbën aa buoat ku thiärdhiëc ku diäk. Tëwën cök rec juëc këlä, buoi akëc yic rëet.

¹² Go Jethu lëk ke, “Bäk, miëthkë.” Ku acïn raan tök kam kəc ye buoath ci ye cak thiëëc, “Ye yïn ña?” Rin ñic kek ye lon ye yen Bëny.

¹³ Go Jethu rot cuot ku lööm ayup ku yïk ke ku ben looi këya kek rec.

¹⁴ Këlä, Jethu aci rot nyuöth kəc ye buoath kën yen yic diäk, tëwën ci yen rot jöt kam kəc ci thou.

Jethu ku Pïter

¹⁵ Wën ci kek mith ke lëk Jethu Pïter, “Thaimon wën Joon, nhiaer ya apëi tën të nhieer köckä ya?”

Go bëër, “Ee këya Bëny, añic lon nhieer yen yï.”

Go Jethu lëk ye, “Biöök amälkië apath.”

16 Ku ben Jethu lëk ye, “Thaimon, wën Joon nhiar ya apeɪ?”

Go bëër, “Ee këya Bëny anjic lön nhiëer yen yï.”

Go Jethu lëk ye, “Biöök amälkië apath.”

17 Ku ben Jethu thiëec arak dët ye kek diäk, “Thaimon, wën Joon nhiar ya?”

Go Pïter puşu dak rin cï Jethu ye thiëec arak dët ye kek diäk, “Nhiar ya?” Ku lëk ye, “Bëny, yïn anjic këriëec ëbën, ku yïn anjic lön nhiëer yen yï.”

Go Jethu lëk ye, “Biöök amälkië apath,

18 Wët yic alëk yï, wäär ɲot ye yïn riënythii ke yïn ye rot guiir ku lör tē wïc piändu, ku tē bï yïn dhiöp ke yïn abï yicin yaak tuen, ku raan dët abï der ku thel yï tē cïi wïc ba la thïn.”

19 Käkka aaci Jethu lueel bï nyuöth Pïter tē bï yen thou thïn, ku bï kəc cöl aaye Nhialic leec thïn. Ku jöl Jethu lëk ye, “Buöth ya.”

Jethu ku raan dët ye buöth

20 Go Pïter yenhom wel ku tïŋ raan dët ye buöth nhiëer Jethu ke buöth ke, raan wäär thiäak kek Jethu wäär mïth kek, cï Jethu bën thiëec ëlä, “Bëny, yeŋa bï yï la gaany?”

21 Wën tïŋ Pïter ye, ke lëk Jethu, “Bëny, na raan dëtë, bï yiëndë?”

22 Go Jethu bëër, tënë ye, “Na wiëc bï pïr yet aköl bï yen bën, ke yeŋö tënë yï? Yiin ëmën buöth ya.”

23 Go wët thiëi piny kam kəc buöth Jethu lön raan Jethu buöth kënë acii bï thou. Ku akəc Jethu lueel lön cïi yen bï thou. Acï lueel, “Na wiëc bï pïr yet aköl bï yen bën ke yeŋö tënë yï?”

²⁴ Raan kënë yen ë raan Jethu buəəth jam kək cī tīŋ, ku yen ë gēt ke aya, ku aŋic lən wēt cī lueel ë wēt yic.

²⁵ Ēmën kajuēc kək aatö thīn, kək cī Jethu looi. Na ke cī gät piny ëbën, tök ku tök, ke ɣen aya thöön lən piny ëbën acii lëu bī athör gät jət.

Lëk yam
New Testament in Dinka, Southwestern (SU:dik:Dinka,
Southwestern)

copyright © 2006 Wycliffe Bible Translators, Inc.

Language: Dinka, Southwestern

Translation by: Wycliffe Bible Translators, Inc.

Dinka, Southwestern

dik

Sudan

Copyright Information

© 2006, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Dinka, Southwestern

© 2006, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 18 Apr 2025 from source files dated 29 Jan 2022

d94b9d26-33ff-5c4e-819f-5bfe86ac9e55